

四庫全書

集部

欽定四庫全書

集部
忠肅集卷十九

詳校官編修臣翟 槐

中書臣劉源溥覆勘

總校官檢討臣何思鈞

校對官主事臣陳 墉

謄錄監生臣王 涵

欽定四庫全書

忠肅集卷九

明 于謙 撰

雜行類

兵部為西番劫殺人命事兵科抄出鎮守西寧陝西行都司都指揮僉事汪清奏准本司咨奉右軍都督府勘合准兵部咨呈內府抄出鎮守西寧內官保受等奏景泰二年十二月十五日據西寧衛管下隆布簇已故千戶索諾爾加下舍人格珪雅克等齎西番文書前事專差

舍人田傑齎本具奏該本部官欽奉聖旨兵部知道欽
此又該鎮守西寧都指揮僉事汪清亦奏前事通抄到
部查得先該鎮守西寧內官保受等奏稱河州衛管的
哈斯哈巴爾一枝頭目新濟做强盜搶殺隆布簇人畜等
因具題抄出已經覆奏行移河州都指揮同知蔣斌等
差人撫諭設法整治若果輸情服罪照依西番體例陪
償若生拗不服令該簇頭目擒拏監候奏請發落續該
鎮守陝西興安侯徐亨奏稱不見賊人新濟到官招認

欲差指揮一員量帶官軍會同西寧衛委官前去該簇
撫諭如是不服設法擒拏等因具題抄出又經行移鎮
守陝西左都御史陳鑑再行會議若無違礙就便依擬
施行如是別有良法宜從處置去後今抄前因叅照所
奏係干敵情若不作急處置停當誠恐各該番簇互相
糾集扇動為非重貽地方之患未便合無照依所奏令
該府差人馳驛齎文與陳鑑同鎮守河州都指揮同知
蔣斌并鎮守西寧都指揮食事汪清公同內官保受等

查照原今所奏選差諳曉敵情的當官員量帶人馬前去該簇宣明朝廷恩威諭以利害禍福使其感悔革非輸情服罪將原搶頭畜依西番體例照數歸還令其各安生業不許再起釁端互相讐殺如是執迷不服冥頑梗化差去官員整搦士馬遙振軍威着落該簇頭目運謀設策擒拏務在目下得獲監候星馳具奏既不許視常怠忽縱惡長奸亦不許輕率苟且致有激變如或處置乖方遷延推調以貽後患罪有所歸本部官具題奉

聖旨是欽此欽遵通行到臣叅照國師羅壘凱巴喇嘛
吹戰等所奏搶殺事情另行外臣等與同內官保受等
行委西寧衛指揮僉事甘輔呈依奉統領官軍并帶原
告舍人格珪雅克等前去哈斯簇會同鎮守河州都指揮
同知蔣斌委官指揮使韓春并守備歸德州地方指揮
僉事張昺著頭目且伊實等行拘為首番人客拉木達
爾到官供稱有西寧扎實簇千戶多爾濟噶爾管的番
實哥引路著我們殺了百戶潘卓勒姜搶了馬牛各番分

用就與原告格珪雅爾等當官面證明白輸情服罪將原
搶馬牛依數陪還原主收領外其人命西番體例各備
馬二十疋牛二十六隻甲一副虎皮一張俱交與原告
格桂雅爾等收領女兒一箇與苦主已故百戶潘卓勒姜
男做親謫和了當令其各各生業取具各番以後不致
互相讐殺番狀在官回呈得此皆照前事已行撫追陪
還原搶馬疋及牛隻賠償人命了當等因具奏又該汪
清奏為西番搶刼殺傷人命事內稱行委西寧衛指揮

甘輔帶領原告國師羅壘凱巴喇嘛吹戩舍人格珪雅爾
等前到哈扎實簇會同鎮守河州都指揮同知蔣斌委
官指揮使韓春等并守備歸德州指揮僉事張昺拘喚
原認頭目已嘛帕和尚扎勒吉森番賊新濟等到官與
原告隆布簇國師羅壘凱巴等當官面對明白有賊人
新濟等輸情服罪將原搶馬牛羊隻依數陪還原告領
外其人命依西番事例陪償甲二副馬一十五疋牛一
十三隻女兒三箇與苦主喇嘛吹扎等第沙克多爾做親

謫和了當令其各安生業就取以後不致互相讐殺番
狀在官等因具奏該本部官俱欽奉聖旨該部知道欽
此又該西寧鎮守內官保受等亦題前事通抄到部叅
照所照前因雖稱各番照依彼中體例賠償馬疋人口
等件謫和了當取具以後不致互相讐殺番狀在官緣
番人之性反覆不常雖已賠償服罪未必出於誠心若
非防範合宜不免終貽後患合當隄備謹嚴庶幾永遠
無虞合無令該府行移汪清公同保受等務在整飭士

馬申嚴號令固守城池隄備不測仍將各番頭目加意撫恤於嚴厲之中寓寬恕之意務使消沮奸謀經久安妥不許因見各番暫時服罪遂以為出於實心後無他變因而怠忽不謹及縱容各該頭目生事騷擾致有激變再為邊患如違罪有所歸緣係處置敵情及奉欽依該部知道事理具題景泰三年六月二十六日奉聖旨是欽此

兵部為邊務事兵科抄出鎮守陝西刑部右侍郎耿九

疇題節該欽奉勅諭陝西自昔國家重地況今外敵未寧邊務固所當急持命爾往彼處代左都御史陳鑑同奉御王壯兒長隨陳善鎮守地方操練軍馬撫安軍民整理邊務欽此欽遵行移鎮守陝西都察院左都御史陳鑑咨交卷內開西安左前後三衛并西安右護衛操練策應官軍舍人餘丁并有民壯中間多係屯田單丁納糧人數照例於春首放回農種辦納稅糧子粒遇冬赴操外其存留軍餘舍人義勇投充等項共該三千九

百二名常川守城操練及據陝西都司管操都指揮同知楊得清亦於本月初六日開報與臣手本內看得却止有三千三百四十四名比與左都御史陳鑑咨內少報五百五十八名臣會同奉御王莊兒等前去教場點視於內又少三百九十一名通前共少九百四十九名當審據本官開稱差去打旗杆木二百五十名又差去送興安侯徐亨并取討口糧事故等項一百四十一名其餘俱係放班之數臣查得放班係三月初一日至四

月二十四日放去今報見操係五月初六日既稱放班緣何不行開豁及照各衛所官員有將新軍不收月糧而私家役使者有將操軍賣放在閒而辦納月錢者或假以科差而科要盤纏或捏作逃故而冒支官糧情弊百出非止一端以致軍伍不清士卒被害追究間遇蒙赦宥仍照節該欽奉詔書內事有應改正者並須改正欽此欽遵又經責令楊得清并西安左等衛管操指揮朱榮等將未報及點名不到軍人查送改正收操於內

追出擅差打水軍人二百五十名送興安侯徐亨并事
故軍人一百四十一名查審改正著操外其餘五百五
十八名累次追要其都指揮同知楊得清等不知改過
自新仍前執稱俱係放班之數至今尚無一名到官叅
照楊得清膺方面之重寄享朝廷之厚祿正當披瀝肝
膽竭盡忠誠以圖報補於萬一可也豈期本官心懷奸
貪挾詐欺罔賣放官軍而不令操練遇蒙赦宥而不改
前非所據本官及西安等衛管操指揮千百戶朱榮等

俱合查提追究以警將來再照陝西係臨極邊去處營屯重兵三邊軍馬不為不多誠恐各邊管操官員俱有此弊深為壞法未便如蒙乞勅該部通行禁約如此則法令明而官員知戒軍伍清而守備無虞具本該通政司官奏奉聖旨兵部知道欽此欽遵抄出到部照得陝西正係緊要邊方內則屏蔽諸夏外則控制西陲正宜訓練官軍振揚威武以備防奸禦侮安人保邊今耿九疇奏稱前項官軍舍餘民壯共三千九百二名都御史

陳鑑以是開數咨報耿九疇如法操練及致點閘共少
九百四十九名其都指揮楊得清隱下及私役五百五
十八名不令赴操及至查審多方破調顯是楊得清不
以軍務為重不能守法奉公貪圖財賄賣放私役但知
得利肥己不思盡心為國況楊得清平日素無廉潔謀
勇之譽賸有貪濁關茸之名不得軍士之心有玷方面
之職兼且賣放私役數多情犯十分深重若不行提問
罪非惟邊將無所懲艾而互相效尤抑且兵備日益廢

弛而遇警悞事合無行移侍郎耿九疇會同巡按陝西監察御史將楊得清及西安左等衛管操指揮千百戶朱榮等通行查提究問明白楊得清監候具奏伏請聖裁降調極邊以為貪濁害軍沮壞兵政者之戒其餘依律照例發落本部仍通行各處總兵等官將所部軍士務在盡數令其在官操練其間若有似此私役軍士剝削財物廢壞邊務者聽彼處鎮守巡撫叅贊等項侍郎都御史及巡按監察御史等官指實叅奏拏問如

此庶使餘人知懼不敢賣放官軍邊備充實不致踈虞
悞事及照興安侯徐亨比先鎮守陝西不能撫恤兵民
及至取回來京又行占用軍士經今已是日久尚未改
正發回似此不知廉恥沮撓軍務亦合行提問罪追要
原帶回軍人前去陝西操守緣合問楊得清等係軍職
徐亨係應議官員及奉欽依兵部知道事理具題景泰
三年六月二十七日奉聖旨是徐亨不問他占用軍士
著退回差操欽此

兵部為謀殺父母等事兵科抄出右副總兵都督僉事武毅等題據鎮安府致仕土官知府岑永壽呈先娶妾梁氏生男岑元氣妻常氏玉珍撫養為男後娶雲南府通判女農氏為妾分居鎮安峒生男岑祖德本職因疾族目岑亮等保結長男岑元氣奏准替職管事農氏聽信間吏呂敬刁民黃舉捏詞告舉邀人惑眾要攻城池岑元氣蒙調領兵出征回任被岑祖德趕殺上司節次委官伴送被岑永祿護印不與諒府刁民農保等奏保

岑祖德承襲不准發惡走回鎮安峒暗集姪岑世紹岑
世祥族目岑罕黃玉等邀請交趾蒙當保樂二州黑胸
羅徠并岑祖德母弟農祖叅農三統領廣南府目兵并
上林長官司母姨農招娘差領兵馬行劫計同目民許
顯至景泰三年三月初五日岑祖德引兵到城下營九
處約一萬餘徒燒燬目民房屋攻破城池岑祖德等抄
取本職并男岑元氣家財綁縛本職欲害賴有委官南
寧府照磨賈福等勸將本職與通判何謙家保看當被

岑祖德押妻常氏玉珍至墟場親殺令家人分屍亂殺族目岑合岑通聰等三十餘名人民不知其數擄去男婦二千餘口牛馬頭畜至十三日於城中山內捉男岑元氣孫岑壁亦將去墟場殺死分屍本職妾黃氏男婦呂氏岑祖德收姦次男岑將等不知存亡緣岑祖德的係本職血脉不該倚恃外親豪衆邀害兄母良民霸管印信囑差巡檢黎清起捏本職關稱岑元氣恃逆不孝占奪祖德妻常氏無蕭畏罪自縊身死將家人黃二紋

死頂作元氣身屍抑逼本職舉保承襲通判何謙坐視
緘默輒從貪行申達本職用計逃至田州府投生除闕
田州思南等府太平泗城奉議等府助兵外乞行各該
府州撥兵會合殄滅岑祖德等庶得邊方寧靖等因具
呈又據廣西都布按三司各呈前事查得先准右軍都
督府勘合咨為奸惡叔殺激變地方等事該太平州護
印土官族等并土官知府岑元氣各奏稱被祖德謀奪
官職殺害目民并將岑元氣趕逐奪印等情已經會議

委馴象指揮沈能會同廣西都布按三司委官勘提去
及委指揮高旻伴送岑元氣回住續據指揮高旻呈稱
同致仕知府岑永壽令族目人等就太平州接取知府
岑元氣回府掌管印信撫治目民及岑祖德懼罪逃回
舊鎮安峒潛住等因回報行間今申前因臣會同巡撫
廣西兼提督軍務刑部右侍郎李棠巡按廣西監察御
史張濶廣西都布按三司都指揮同知杜衡左布政使
夏時按察使王增佑等計議得鎮安府係廣西極邊衙

門與雲南交趾接境今岑永壽呈稱岑祖德糾合交趾及廣南等處目兵殺害母兄目民趕逐親父係干惡逆重情若便調兵會捕緣雲南交趾俱係外境地方又且廣西柳慶等府州縣即今賊情未息官軍俱在哨守難更摘離動調除委官會同都布按三司各委官前去鎮安府撫諭本府目民各安生業不許聽人扇惑結聚為非別行設法擒獲首惡岑祖德問罪及行雲南等處各行屬查勘隣近鎮安府地方目民有無聽信岑祖德糾

合越境情事實情回報至日另行外緣係緊要邊情具
題又該武毅題稱自景泰三年三月初一日起節據桂
林柳州平樂梧州潯州等府永福荔蒲來賓平南等州縣
節報賊寇共七十二起或二三千或一千五百至五七
十徒攻打城池燒毀村堡殺擄男婦剽掠財畜滋蔓不
息等因又該提督軍務刑部右侍郎李崇同巡按監察
御史等官張瀾等題稱本年四月以來節據柳州等府
羅城等縣民人黃善才等告稱賊首韋公行等或二百

餘徒或八百餘徒出劫民人潘道寧等家燒毀房倉殺
擄男婦劫取家財牛隻等件殺人放火聲言要打州縣
城池等因具題該通政使司官俱奏奉聖旨兵部知道
欽此欽遵通抄到部叅照鎮安府土官知府岑永壽伊
男岑祖德糾合目兵及邀請交趾蒙當保樂二州黑胸
獍狍肆逞兇暴攻破府城殺害兄弟母趕逐親父惡逆重
情已是顯著又况所集賊衆約有一萬餘徒擄去男婦
已及二千之上事體緊急邊境擾攘莫甚於此武毅等

自合調度官軍躬親前去整理疾如救溺拯焚尤恐緩不及事今却奏稱若便調兵會捕係是外境地方止是調弄紙筆欺罔朝廷略不相機設謀上緊處置失機悞事情罪顯然而近日柳州梧州潯州平樂等府各屬盜賊生法不計其數地方不寧軍民受害而各起徒因見總兵等官怯懦無為肆無忌憚蜂屯蟻聚得以自由犬噬狼貪罔知紀極流毒生靈日盛一日臣等竊惟土地人民實祖宗之創建總戎提督乃朝廷之重托今彼處

賊情危急而各官怠忽自如若不差官體察另為處置
萬一地方失陷未見貽悔噬臍臣等訪得兩廣土人有
號狼家軍者驕捷健鷙勇於戰鬥涉險履危如行平地
蠻賊素所畏懼比先年間總兵官都督韓觀山雲安遠
候柳溥在彼之時行事公道蠻夷信服以故號令易行
遇有徭寇生發起調狼兵依數即至蠻人畏其殺戮不
敢輕動近年以來都督武毅侍郎李棠在彼整飭事務
不能頓綱整紀興滯救疲惟務因循怠忽苟延日月而

三司官員又各庸常苟且凡百處事不能合乎公論慳
乎下情以致軍令不行土人不服是致各項賊寇互相
扇動侵擾地方攻圍城池殺害人民搶掠男婦剽掠財
畜燒毀房倉數年以來卒無寧歲而今歲比之往年則
地方無處而寧軍民無時而安不能擒一賊徒斬一賊
級惟見奏報聲息乞調官軍總戎守土之官所為若此
地方軍民之倚果何賴焉今事體危急頗甚合當以夷
攻夷合無請勅差錦衣衛能幹頭目同有風力御史各

一員馳驛前去廣西密切體察所屬地方賊情動靜何似及武毅李崇有無總兵提督之才處置一應事務曾無從公盡心區畫其土官衙門狼兵如果應合調動就同武毅李崇等計議處置或度量該管土官署職量與賞勞激勸可調狼兵若干就將武毅等堪否任用及起調狼兵緣由具實回奏以憑定奪若兩廣地方賊寇俱各猖獗而兩處總戎之官互相齟齬行事矛盾不能成功合用文職或武職大臣一員總督其事提綱挈領節

制兩處軍馬併力勦除賊寇亦須奏來處置務在勘議明白不許朦朧悞事仍請勅武毅李棠公同巡按監察御史都布按三司堂上官整搦官軍躬親統率前去鎮安府地方將賊子岑祖德設法擒獲解京其有同惡之人聚集未退務在宣明朝廷恩威以謂岑祖德謀為大逆殺害兄母首惡在伊爾等被其誘惑而來能將岑祖德送出軍前爾等卽是無罪良民各還本土保全身家如或恃惡不悛不肯退散度其氣勢必須用兵宜從各

官動兵勦捕仍行附近安南地方軍衛有司及守備等
官一體嚴加哨守毋縱外寇入境務俾事出萬全百無一
失不許纖毫怠忽輕率無謀致悞事機及中賊計重為
後患仍令李棠體勘通判何謙有無通同坐視妄行申
達情由明白通行會奏本部仍行廣東湖廣將應調廣
西守備官軍上緊發遣不許遲滯及行都督董興作急
領軍前來廣西地方會合殺賊毋得托故逗遛失機悞
事自取重罪緣係處置賊情及奉欽依兵部知道事理

具題景泰三年三月初二日奉聖旨是欽此

兵部為預防邊患事吏科抄出太子少師兼吏部左侍郎翰林院學士江淵題臣聞自古帝王之禦外侮消邊患其要有三在臨之以威撫之以恩而防之有備而已三者之中必有一焉而後吾之治具有可恃而邊境雖虞不足憂矣傳曰凡事豫則立況於禦暴保民有國之重務也哉臣竊見四川為國家西南要藩近年因征討麓川貴州民困於轉輸兵疲於戰伐其近邊諸夷如棟

巴罕呼地廣人衆自洪武永樂以來生息至今又復吞併雜谷地方勢益強盛薦謀不軌雖有進貢之使絡繹不絕其實假此窺我邊境道路以俟事釁況今雲南貴州賊勢未甚寧帖儻一旦變詐諸夷聞風與彼聲勢相應其患尤為難制今既未暇加之以威撫之以恩若不豫飭邊備而欲坐使蠻夷帖服終保無虞不可得矣且如松茂等州天全六番等夷當其要衝已有侍郎羅綺鎮守其建昌寧番等處當其腹背先差大理寺少卿張

固鎮守取回見有都督徐海在彼年久謀勇有為蠻夷
信服緣未奉勅鎮守軍衛不相統屬誠恐有警不服調
遣誤事非小伏望皇上俯念遠民豫修邊備乞命該部
會官計議將在彼巡撫等項官員無益而有損於民者
取回別用仍於在京大小官員內推選曾經軍旅通曉
邊境事情者一員前去專一往來提督修理城池完繕
器甲整擷軍馬仍請勅與侍郎羅綺并都督徐海令謹
守信地增修武備遇警則彼此相援使諸夷知我內外

有備動輒首尾腹背皆受其敵如此必能消其悖逆之心庶幾邊境永寧民安生業誠保邦禦侮之要也臣生長蜀地深知彼處邊境利病不敢緘默具題奉聖旨朕常懷西蜀地方未曾十分寧息蠻夷反覆之情未能信服今江淵又言此事正合其理該部便計議鎮守巡撫之官務要得人無益官員取回別用務在事安民安欽此欽遵抄出到部叅照江淵所言係干邊方重事既稱要請勅侍郎羅綺都督徐海令其謹守信地增添武備

遇警相援以消外寇悖逆之患又稱令該部計議將在
彼巡撫等項官員無益而有損於民者取回別用仍於
在京大小官員內推選曾經軍旅通曉邊境事情者一
員前去往來提督修理城池整擷軍馬等因獨不言及
巡撫左僉都御史李匡顯是李匡合當取回臣等看得
太僕寺卿李賓剛正有為堪任重寄兵部郎中林闕厯練
老成曾經軍旅合無請旨於各官內將一員陞改憲職
請勅令去更替李匡巡撫四川撫恤軍民整飭邊備務

在持廉秉公盡心効力痛革宿弊以安衆心俾下人各
得其所外寇不敢侵擾違者治以重罪其李匡取回吏
部奏請定奪惟復止將李匡取回令見在彼鎮守內臣
并羅綺及巡按御史三司官員整理一應事務不必另
差官員前去未敢擅便定奪伏乞聖裁仍依擬請勅二
道與羅綺徐海各要用心謹守地方上緊操練軍馬內
則保庇兵民外則隄防夷寇務在有備無患不許怠忽
踈虞緣係處置邊務及選持取回官員事理未敢擅便

具題景泰三年七月初三日奉聖旨是李匡無益取回
送吏部別用再不必差官欽此

兵部為欽依事兵科抄出朝鮮國權署國事李弘暉奏
景泰三年五月初三日陪臣安完慶齋捧到勅諭節該
前勅所言拒絕野人女直不許容留一節尤須謹守今
後如再有被擄去漢人在王國邊境者仍須差人管送
前來尤見忠誠欽此臣先父珣未及回奏不幸薨逝臣
竊照所有野人女直本國內不曾容留矧今累降勅諭

聖訓切至臣尤當欽依謹守在先被虜漢人逃至邊境
隨到隨解不敢稽緩今次又將被虜逃來男子王教化
婦女尚赤哥等共二十九名口解赴遼東都司交割今
後再有被擄漢人逃到邊境臣安敢稽留謹當欽遵勅
旨施行具奏該本部官欽奉聖旨兵部知道欽此欽遵
抄出到部叅照前事既已將被虜男婦王教化等二十
九名口解赴遼東交割別無定奪合無請勅就令本國
差來朝貢使臣齎回朝鮮國獎諭權署國事李弘暉嘉

其能繼先志保障藩維効順中國不肯容納外域之人
又能將我邊原先被虜去人口送出軍前具悉忠誠特
加旌異自今以後宜益勵臣節恪遵朝命凡外番部落
永遠不許侵擾中國被搶逃來男婦多寡必須送還以
答朝廷禮遇之意以守先王臣順之道如此庶可以慰
遠人之心而為保邊之助緣係請勅獎諭外夷并奉欽
依兵部知道事理具題景泰三年七月初十日奉聖旨
是欽此

兵部為乞恩事內府抄出靖江王奏自永樂二十一年
廣西都司來啟蠻人出沒討軍截殺本府差官奏奉皇
太子令旨量撥與他後撥官軍八百一十六員名遞年
征進累次轉補逃亡事故官軍數多不絕至正統十四
年總兵官柳溥具奏正統五年五月初五日欽差錦衣
衛舍人李旺齎書諭臣先選精銳官軍五百員名赴總
兵處聽調再選五百員名聽候朕念王府使令不可缺
人且留在府遇緊急調用欽此除欽遵外調撥餘丁五

百員名在府聽候其柳溥皆作警急一概調用後因官軍各告衣甲損壞臣具奏比依湖廣廣東事例更換回衛輪班已蒙聖恩准臣所奏分為兩班一年一換至景泰元年都督田真劄付護衛言稱蠻人滋蔓奏准兩班俱調不論已被蠻賊殺死官軍數多臣已經開奏明降景泰三年九月內劄付送前班已故指揮曹福原領官校到衛臣就點看實在三百六十六員名內中亦在征傷不堪之數虧折事故一百八十六員名景泰三年三

月內割取更替臣選官軍一百八十六員名輪補去訖
本年五月內二班已故指揮許正等官軍臣親逐一點
視止有見在百戶吉慶旗軍二百八員名臣竊思今若
不備情具奏查得前項虧折已將護衛官軍盡數撥補
去後又發回二班官軍除另行跟捉原逃旗軍聽候外
若後輪班惟復移文仍要索補虧折之數委的缺少臨
期無軍完贖不無累煩聖聽臣思比先奏准一年一換
今將兩班輪作三個月替換越致累損繁難竊見護衛

官軍先於永樂年間全伍調征交趾并到今逐年差征
廣西地方事故亡絕數多餘存不堪數少亦有匠人造
辦應貢表箋箱袱馬匹什物如蒙准奏伏望皇上篤念
親親隆厚哀憐臣遠在屏藩孤寓艱難委將護衛官軍
盡數撥補前班去後乞賜人匠造辦表箋等項及宥免
後補事故官軍仍依奏准一年一換輪班事例寬恕便
益實為感恩之至為此具本專差內官吉慶親齎具奏
又該靖江王亦奏前事內稱伏望叔母上聖皇太后叔

母皇太后篤念親親隆厚哀憐乞賜人匠造辦表箋等
項宥免後補事故官軍仍依一年一換輪班事例等因
該本部官俱欽奉聖旨兵部知道欽此欽遵通抄到部
叅照奏稱要將前項護衛官軍宥免事故不補并要一
年一換輪班一節照得前項官軍先因彼處盜賊生發
官軍調遣不敷欽蒙選出聽總兵官調度殺賊設若賊
寇平安地方無事自當發回原衛奈因連年賊盜不息
人畜累被剽掠地方受害不可勝言若非前項官軍協

同撫捕則總兵等官憑何調遣又况軍衛之設正所以保障城池殄除盜賊王府所在之處蠻賊竊發縱使調用前項護衛官軍亦是保護王國若是地方擾攘則王國何由得安兼且廣西地方軍衛連年征調不息軍士凋耗數多惟護衛官軍平日差遣數少什物頗為完具若依所奏事故者免其撥補三箇月輪替者仍作一年則是事體勞逸不均別衛委加靠損徒有其名而無其實軍士日加消耗機務日益廢弛其貽後患實非細故

所奏難准合無行移總督兩廣太子太保兼左都御史
王翱副總兵署都督僉事陳旺令其到彼將先次選出
軍方仍要三個月替換聽總兵等官調度殺賊中間若
有事故等項令原衛挨究精壯之人照數撥補不許故
違有誤軍務候地方賊情十分寧靖另行定奪再照各
處王府設置長史紀善伴讀教授職專輔導親王繩愆
糾繆而王府一應施行事務皆有定法為各官者豈不
知朝廷萬機皆斷自聖衷明見萬里今以輪操官軍一

事之微輒敢奏稱伏望叔母上聖皇太后非惟乖違舊制抑且瀆亂朝經詳其所由蓋是本府長史紀善伴讀教授不能盡心輔導及護衛指揮并首領官員意圖占怯官軍故行撥置煩瀆以致行事乖方有失大體及本府累次為因細故計奏總兵巡撫巡按等官及行提問事多不實顯是輔導隨侍不得其人以致事體紛擾上千天聽合無行移都察院轉行巡按廣西監察御史將靖江王府長史紀善伴讀教授并護衛指揮及首領官

照名查提問擬明白監候奏請發落本部仍行廣西都司轉行護衛將前項官軍照舊三箇月更換事故撥軍補替不許仍前展轉違誤緣係叅問王府官員并奉欽依兵部知道事理景泰三年七月十七日奉聖旨王府官員都不問護衛官軍照常三箇月更換再展轉誤事不饒欽此兵部為邊務事准提督軍務都察院左副都御史年富咨准征西前將軍鎮守大同總兵官定襄伯郭登手本准後軍都督府備兵部咨該當爵等題有玉

林衛千戶楊增畏懼備邊詐給文引在京潛住等因本部官奏准行查千戶楊增於何年月日給到順天府文引在身并將本官來歷緣由籍貫明白回報等因移咨行據大同右等衛管操都指揮王諄等備玉林衛呈該左千戶所申准本所正千戶楊增關景泰三年四月初三日有武清侯石亨下舍人石傑前來大同右衛取討遺下帳房本舍言說你跟我去是增赴鎮守少監韋力轉處告知跟同過關將帳房交與武清侯石亨外當跟

舍人石鐸過關回衛在隊差操並不曾給到順天府文引在外幹事取具本官親供脚色繳報到爵叅照楊增供係山西平陽府曲沃縣景明里人洪武二十五年有父楊海抽出充玉林衛左所百戶姚諒下總甲宣德元年病故將增補役仍充總甲正統十四年四月內跟總兵官石亨巡哨至黑谷口剿寇有功陞總旗本年九月內蒙總兵官武清侯石亨奏稱調取官軍指揮毛永等赴京操練行至定州剿寇有功陞試百戶後該指揮石

彪奏定州地方兵村剿寇有功陞實授百戶景泰元年
二月內蒙放回原衛操守本年五月內跟隨叅將等官
許貴等出城剿寇有功陞副千戶本年七月內又跟許
貴等出城剿寇有功陞正千戶為照楊增伊父楊海於
洪武二十五年抽充總甲至宣德元年病故楊增補役
未審楊海因何數十餘年不行併鎗奉何處明文充總
甲其楊增既補前役又因何二十餘年亦不保送併鎗
及楊增赴京往來若無文引豈能過關中間顯有奸詐

又經駁查去後續據都指揮王諄等備玉林衛呈該左
千戶所申准正千戶楊增闕有父楊海於前項年月抽
充本衛所軍病故將增補役有故父遺言洪武年間係
總甲因黑谷口有功不合聽父遺言報作總甲陞授委
跟舍人石傑等往來過關並無給到順天府文引及行
查楊增父楊海委係先充軍役是實除另行改正外具
衛所官吏保結回報等因叅照千戶楊增原係軍身妄
報總甲冒陞總旗及係邊衛軍役官員不行操守夾帶

過關在京潛住衛所官吏明知楊增詐冒陞授亦不舉
行改正及至行查却又串同朦朧回報方稱另行覺舉
似此夤緣作弊雖係犯在革前其革後不行改正俱合
究問緣係兵部行查事理除咨後軍都督府外合用手
本煩為施行准此叅照楊增詐作總旗歷陞正千戶不
行在衛差操却乃跟隨舍人石鐸石傑倚恃武清侯官
威往來邊關得以自由及至查出詐冒却又囑托衛所
官吏符同回報及訪得楊增自小在武清侯家下做飯

厨子並不曾操練當先廝殺只是許貴等因武清侯面
情擴名造冊妄報功次冒陞前職似此詐奸百端若不
重加譴責則賞罰不明人不知懼邊務廢弛移咨到部
案查先為前事已經履奏行勘去後今該前因叅照楊
增黃緣請托冒陞官職吹聲借勢越度邊關上則欺瞞
朝廷下則阻壞邊務遇蒙大赦以後亦不明白改正并
本衛官吏扶同朦朧結勘遇例仍前掩遮俱合查提究
問合無行移都察院轉行巡按御史將楊增并扶同保

勘玉林衛掌印并首領官吏通行查提到官取問明白
依律照例發落仍要查究楊增冒陞官職緣由連入送
發山西行都司轉送本部以憑減革施行緣合問楊增
等係軍職具題景泰元年七月二十一日奉聖旨是欽
此

兵部為邊務事照得先該欽差總督軍務少保兼本部
尚書于謙議擬奏准將法司問罪擬囚有該充軍者除
山西發大同沿邊各衛其餘處所俱發宣府總兵官定

奉撥龍門獨石鵬鶚一帶守備續該宣府總兵官右都督范廣并提督獨石馬營等處都督同知孫安等節開龍門開平等衛發過充軍等項犯人名數到部看得其間著役者少在逃者多為照前項衛分正係緊要邊方合當用兵守備其前項撥去之人往往挾詐玩法私自逃回已經行移各該原籍官司并在京五城兵馬設法挨解及行居庸等關口守備官員用心盤詰近該守備紫荆關右都御史陶謹咨開發去修守犯人李敬等二

十二名俱各不到本部又經奏准通行挨捕去後今照
紫荆居庸等關俱係附近京師控制邊境喉襟之地朝
廷差遣文武大臣率領官軍守備蓋欲阻絕外敵鞏固
藩籬禁革奸細辯問真偽盤詰異言異服之人以為經
久無虞之計豈期各官全不用心廼事彼此因循月久
以致口外衛分官軍相率逃來腹裏而發去本關人犯
亦各公然在逃平居無事之時尚且不能盤詰設使北
騎侵犯豈能禦侮推鋒失機誤事必由於此原其情犯

合當通提究問但即目緊要防秋而各官俱係領軍官
員若便一概行提慮恐缺人提督倉卒之間愈加誤事
兼且先前迤北走回之人亦往往說稱其首差有奸細
之人分往迤南探聽消息言雖未委虛的事亦不可不
備若此弊不革而口外之人互相效尤日甚一日則逃
亡無從杜絕邊備何由充實事關大計不可不慎合無
令該府通行各關守備都督都指揮等官公同文職大
臣嚴督該管地方大小險隘關口守把官軍務在晝夜

用心哨守不許似前怠忽及通同作弊將邊衛及關隘修守軍士容情放入腹裏縣住若有此弊宜從守備都督等官輕則量情懲治重則奏聞區處其有逃及二十人之上者連守備等官一體叅提究治本部仍行都察院轉行各該巡關御史務要往來盡心巡察禁約防範毋得苟且僨事致貽邊患如此庶使邊關嚴固緩急得濟緣係整飭邊務事理具題景泰三年七月二十一日奉聖旨是欽此

兵部為建言事吏科抄出少保兼太子太傅戶部尚書文淵閣大學士陳循等將所言事件開列具題節該奏奉聖旨該部計議停當有利於軍民即便來說施行欽此欽遵抄出到部除關給誥勅等件吏部等衙門另行外今將南京操江一事議擬開立前件謹題請旨

計開

一操江當修武備竊見南京為國家根本重地武備不可不修其地前有大江戰守之策操江為上是以洪

武年間設立濟川江淮二衛官軍專駕使馬快船隻操習水戰以壯國威永樂年間因建北京惟命都督等官把總練習遇有一應公用北京之物輪流差撥運送當時事有所統船隻堅完加以軍夫整齊差使均平故人心悅服近年以來把總之官或因保取別用或因事故不存船朽軍逃操江之事有名無實運送官物不無有誤況濟川江淮二處軍旗多係湖廣江西人民中間多有親管官員作弊指以令回原籍

修造為由賣放夫船經二三年不赴衛者見在夫船
代當差使絡繹不絕勞逸不均不惟軍伍空缺威武
不振抑且虧損官物有悞上供深為未便如蒙准言
乞勅該部行令南京叅贊機務兵部尚書徐琦寧遠
伯任禮都御史張純等官計議講求操江之策仍於
濟川江淮二衛中推選謀勇廉勤能幹指揮或都指
揮一員專一把總操江修理船隻整飭軍務庶責有
所歸供應不致誤事威武振揚根本安固前件看得

南京為祖宗根本之地東南總會之所先年設置江
淮濟川二衛官軍駕使馬快船隻蓋欲操習水戰以
為防奸禦侮之計後因北京供應煩夥及貴州等處
運送賞賜等件摘派船隻往來裝運近因邊務方殷
南方未靖本部節次奏請勅及行移南京守備等官
整飭武備一應軍馬器械等件必須用心提督有備
無虞今稱前項衛分船朽軍逃操江之事有名無實
多有作獎將駕船之人賣放回還原籍此蓋各官因

循不思興利除弊今陳循等要令南京叅贊機務等
官講求操江之策誠為當務之急合無照依所奏行
移南京兵部會同守備寧遠伯任禮都御史張純等
從長計議前項官軍船隻若何區畫可使宿弊盡除
而人船齊整有何方略可使武備修舉而緩急得濟
其操江官軍必須嚴加提督常川巡視俾蓬檣櫓桅
俱各完具鎗刀弓矢無不鋒利習操舟者務知水道
之順逆習接戰者務識陣勢之離合或衝突或轉鬪

必須動合規矩事有紀律務臻實效毋事虛文管操
官員當更換推舉者悉聽各官從公處置具奏定奪
其運送官物供應係朝廷重務須上緊整理隨宜處
置亦不許有誤操江亦不許有妨接運毋得偏於一
事輕易調動致誤國計通將議過方略具實回奏若
是彼此偏徇日後因而壞事責有所歸并行南京兵部
將江淮濟川二衛見管事管船提督指揮千百戶數
內有貪污虐害軍人水夫及闖茸不能辦事者就便

默退令於本衛帶俸隨操各在從公查取不許徇情偏向有誤大計具題景泰三年七月二十七日奉聖旨是欽此

兵部為流賊劫掠等事兵科抄出巡撫廣東兵部左侍郎揭稽題據廣德守禦千戶所申景泰三年六月二十四日卯時有廣西流賊漿駕桐槽船一百餘隻賊人約有八百餘徒從封川縣流劫前來本所城外劫殺人財等因已經會調官軍前去策應截殺及會本具題外臣

先任廣西布政使九年通考改調廣東今陞前職竊見
廣西地方桂林等七府俱係流官衙門皆有猺獞伶蠻
數種夷人散去山洞恃險負固不入版圖不遵聖化自
古及今肆虐劫殺是其常性可以威制而不可德化慶
遠柳州二府為尤甚其地俱係土官衙門土人與猺獞
伶蠻同類因有土官管治不敢為非惟認納稅租三年
一貢羈縻而已間有讐殺亦其常性若今鎮安田州泗
城州等處讐殺豈能逐一究治乎故曰王者惟守邊疆

治之以不治乃所以深治之也臣與前總兵官安遠侯
柳溥議將慶遠府宜山縣久叛盜賊地方具奏撥與土
官知府岑瑛管治蓋以夷治夷數年之間帖然安靖後
又因廣東黃蕭養作耗調撥岑瑛前來會捕無人鈐束
蠻賊復起然尚有岑瑛調撥頭目統領土兵在彼哨守
未甚猖獗後岑瑛回還彼時若責在岑瑛聽其自治則
此賊不足深慮未審何人建議却將此地不與岑瑛管
治取回與賊掣去土兵遂失利矣竟不思官軍與土兵

哨守孰為得失以致勞師遠饋軍困民疲而蠻賊劫殺殆無虛日以後無奈賊人誑說若得都指揮岑瑛來招撫我輩罷兵遂令岑瑛前去幾被所獲即日本官深居慶遠城內不敢復出四面人民任其劫掠至今未息誠可哀憐及有土官都指揮使黃玠臣見其廉而有智與士卒同甘苦雖奏准令本官常川哨守潯州經今八年軍民信服賊不敢犯其境近聞為事廣西按察司監問以致賊徒蜂起流劫軍民直抵廣東德慶州臣詢訪自

來流賊不致如此因黃琮去後兩廣生靈被其荼毒自古名將比長城正謂此也因此二處不寧他處莫能支持伏望聖恩憐憫兩廣蒼生乞勅該部與安遠侯柳溥計議合無量陞岑瑛職事請勅本官會合官軍殄滅宜山賊徒仍將前項地方照舊撥與岑瑛管治及行巡撫巡按三司從公審勘黃琮情罪念是土官曲加寬宥仍守潯州其地逐漸整理如此則廣西地方得以寧謐廣西既寧則廣東無復流劫之害矣具題該本部官欽奉

聖旨兵部知道欽此欽遵抄出到部叅照奏稱要將廣西慶遠府宜山縣照舊撥與岑瑛管治仍將岑瑛量陞職事一節查得先該宜山縣知縣張宗等奏稱本縣原管述昆等鄉民獞村分洪武年間開設管治正統六年間有老人黃祖記等交結思恩府知府岑瑛奏蒙總兵等官將前項地方撥與岑瑛管束自撥之後首賊韋萬秀等不服岑瑛管束流劫不已乞照舊仍屬宜山縣管束等因行該副總兵都督僉事武毅等回奏會議得若依

張宗等所奏將述昆等鄉賊峒退還本縣誠恐原撥過武緣上林地方徭糧數多一概做做動搖為患非小合無仍令岑瑛管束等因具題抄出本部為照既已副總兵等官武毅等計議回奏要令岑瑛管束合當依擬已經奏准施行外續該武毅等題稱首賊韋萬秀等殺害人民不願岑瑛管束要將前項地方退與宜山縣等因本部又照既是夷情如此激切不願岑瑛管束必是岑瑛拮据飲怨不能奉公撫綏而武毅等比先亦各因循苟

且不曾仔細體訪下情朦朧扶同回奏令岑瑛管治不旋踵間而賊首韋萬秀等不甘因而作耗武毅等却奏又要撥還宜山縣前後議奏不一今既夷情不願岑瑛管束又經奏准行令照舊退還宜山縣撫管去後今揭稽具奏前因緣本官巡撫廣東地方其雷廉等處即報有強賊出沒殺虜人民焚燒衙門副總兵等官黃興等端坐一城止知賣軍肥已不思忘身殄賊及至廣西奏稱賊勢猖獗要與董興會兵勦殺其董興止是虛文延

調並不領軍起程而揭稽全無一言糾奏亦無一策措
置近該御史王允回奏董興不法事情已蒙聖斷將黃
興降做為事官隨軍殺賊并降勅切責揭稽記其怠忽
誤事之罪今本官於所管地方賊情軍務尚且不能處
置停妥却又要將別處事情臆度施行兼且賊情邊務
變詐百端可行於前日者或不可行於今日可用於今
日者或不可用於昔時必須隨時處中然後事方有濟
揭稽之所見者在於數年以前安可執之以為經久常

行之道今揭稽所言如彼事體可否雖已瞭然明白然夷情關係終是難以遥制兼且岑瑛已該本部請勅并關給銀兩表裏賞賜令王翱等前去獎勞今未有功蹟難便陞遷合無差人馳驛齎文與總督兩廣軍務太子太保兼左都御史王翱公同副總兵等官署都督僉事陳旺等從長勘議斟酌夷情軍務其宜山縣述昆等鄉地方當何處置或照舊令本縣管束為宜惟復與岑瑛撫管為當主以至公折以中道一為處置再無更改必

使久遠利便而勿為目前之計必使人心帖服而勿為姑息之謀仍將勘議過應否緣由星馳回奏以憑定奪不許因循積弊彼此含糊以致事無歸結之期賊無寧靖之日非惟自取罪愆抑且重貽邊患其奏要將土官都指揮黃玠曲加寬宥一節查得近該都察院題稱武毅等具奏黃玠謀殺親弟等情為照罪犯已經景泰三年五月初二日大赦免問其干連親屬人犯該本院奏准行令廣西總兵等官斟酌設法行事不許激變及本

部今次議奏請勅關給賞賜獎勞土官知府岑瑛等亦有黃珖職名在內難再定奪亦合行王勰令督同陳旺等查照都察院同本部原今覆奏酌量處置施行務要宣明朝廷恩威訪察邊方事體酌量下情向背寬猛適宜剛柔兼濟務俾賊寇殄除而軍民獲安夷情懾服而事機不失不許輕率怠忽致有激變緣奉欽依兵部知道事理具題景泰三年八月初四日奉聖旨是欽此

兵部為安邊事內府抄出鎮守四川奉御陳涓等題該

四川都布按三司手本呈奉右軍都督府刑部都察院
勘合該四川播州宣慰司草塘安撫司安撫宋景春等
奏為陳言苗夷反叛等事正統十四年五月內為因白
泥長官司地方被苗為惡聚眾攻殺搶掠人財有本宣
慰司舍人楊欽率領土兵守把烏江地方不期楊欽與
同宣慰司役滿令史趙克真使令蠻人蘭錢屯等將景
春等祖墳盡行掘出屍骨搥碎拋棄買求都御史李匡
等聽從楊欽趙克真等囑托交通蠻賊為惡經今三年

之上及聽從反賊尚平圍住節來投降將擄去軍民金銀馬匹送與各官接收又憑楊欽帶同苗蠻金龍科等前去反賊尚平圍住等寨內講和原擄軍民子女五十餘口各分入已及勒取播州宣慰司金銀一千兩土軍營銀五百五十兩其李匡都指揮徐海有金珀帽珠一串金五十兩本官不與革去部下官軍不令調督自行領軍前進草塘駐劄被賊殺死官軍三十餘名擄去馬三十匹本官懼怕黃夜領軍走回有此失機以致苗賊

得勢不息自寫奏本誑稱有功壓令宣慰楊輝僉押用
印奏保仍求鎮守播州及有趙克真原充宣慰司令史
幹作把總強要景春庶母吳氏為妾又將金銀四百餘
兩買囑都御史李匡妄捏征苗有功奏保官職等情具
奏轉行到司備呈到職行間據四川都司備重慶衛呈
為勦殺苗賊事准重慶府牒呈奉巡撫四川都察院左
僉都御史李匡劄付已將守備播州漢土官軍調領前
去勦殺草塘苗賊誠恐本州空虛合無劄付附近重慶

府即於所屬州縣調起民兵五十名各委官吏管領應
付口糧先委重慶衛指揮使徐韶統領前來播州守備
仍委同知凌器玉前來協同守備削平苗賊將前項民
夫發還寧家奉此查得本府所屬州縣二次原送民夫
三千七百七十名除武隆彭水黔江三縣寫遠況兼人
民稀少不調外牒呈准此移關本衛指揮使徐韶管領
前進續准本官關稱民快多係鄉民不諳軍政號令倘
遇警急難以調用移關本衛行屬於曾經練習軍舍餘

丁內量撥跟隨前去兼操便益除依准量差軍舍餘丁
跟隨前去備呈到府不見開到軍舍數目等因到職臣
會同四川都司都指揮僉事趙雄布政司左布政使侯
軌按察司按察使茅惟揚等查得節該欽奉勅四川鎮
守地方撫安軍民凡事須要彼處巡撫巡按三司計議
停當而行非奉上司明文一夫不許擅差違者具實奏
聞欽此已經備行欽遵去後臣等體訪得原征播州四
川行都司建昌等衛官軍二千員名左僉都御史李匡

放回今却又於四川布政司重慶府起調民夫三千七百七十名前去守備竊照播州苗蠻未得寧靜李匡自合轉行臣等并巡按御史四川都布按三司計議調兵策應不合將建昌等衛慣戰官軍擅放回衛却乃徑自行屬起調素未征戰民夫恐誤事機叅照都御史李匡立心奸險處事多疑擅作威福肆行欺罔名為巡撫實害軍民莫敢誰何今本官見征播州掌握兵權恐生別意及恐懷挾私忿乘機將先曾招撫苗衆土民一概激

變勦殺不惟殃及無辜實乃構成邊患况四川軍民連
年征運已甚疲敝若再有事愈加困苦誠有不堪臣等
鎮守地方不敢緘默具題該本部官欽奉聖旨兵部看
欽此欽遵抄出到部查得近該太子少師兼吏部侍郎
翰林院學士江淵題稱要該部會官計議將四川巡
撫等項官員無益而有損於民者取回別用等情具題
抄出本部為照江淵所言係干邊方重事既稱要請勅
羅綺徐海整飭邊備又稱令該部計議將在彼巡撫等

項官員無益而有損於民者取回別用另行差官一員前去提督整理邊務獨不言及巡撫左僉都御史李匡顯是李匡合當取回等因具題景泰三年七月初三日本部官奏節該奉聖旨李匡無益取回送吏部別用欽此欽遵移文行取未到今抄前因叅看陳涓等所奏李匡等擅作威福肆行欺罔及要取回被虜軍民子女共有五十餘口勒要土官金銀贓物已及千兩之上雖是未委虛的終干重情合無刑部出批錦衣衛差人馳驛

沿途直抵四川將李匡并都指揮李名及事內緊關人
犯通行提解赴京取問如律奏請定奪緣李匡係在京
堂上官李名係方面軍職俱未敢擅便定奪景泰三年
八月初八日奉聖旨且都不問待李匡到京覆奏欽此
兵部為息苗安民事兵科抄出行人司行人甯良奏臣
近往湖廣武岡州公幹行過寶慶府邵陽縣地界親見
武岡州沿途舖舍及軍民房屋各被苗賊燒毀過半及
見綏寧新寧二縣并武岡州迤西軍民被苗賊強劫老

幼挈家往東流移死亡無日原其所以蓋因苗賊出沒
不常流劫鄉村至今未已間有在家播種又被殺傷身
命強奪財物復歸洞寨自此得計視為泛常臣訪得武
崗州各峒苗賊形容怪異熟於探聽稍不防禦乘隙侵
擾進退譎詐似曉兵術今欲征勦要識天時察人事可
守則守可攻則攻然兵貴拙速未覩巧遲久於暴師則
國用不足未之為善況今年湖廣衡永寶慶長沙等府
自五月至六月初旬以來間下微雨又不普徧高田禾

苗旱傷低窪又未可保人民艱窘晝夜憂惶今武岡州
苗賊恣肆猖獗若更多調官軍又恐難於供給伏望皇
上一視同仁憫顛連無告之民選才行智謀之士前去
督理軍務相其風土觀其緩急臨機應變息苗安民若
守不足攻則有餘必須詭偽以制勝孫武曰多算勝寡
算不勝而况無算乎臣聞武岡苗賊出没不常而無忌
憚者必知守備官軍出師無算屢被其辱故也且聞苗
賊近日流劫不比往年動經千百餘徒難以勦殺今年

流劫或五六十衆或二三十人東出西沒一聞官軍征
勦隨即奔走入洞大軍回營仍徼肆志貽患一方甚為
可憫為今之計莫若教習牯牛釵法但聞苗賊出時即
便選差的當人密切緝訪何處潛迹何處流劫就便相
其歸路險隘去處約量多寡晝夜出軍潛蹤隱迹先占
勝地下營起伏以時截殺未有不取勝者兵法曰勢如
彍弩節如發機此之謂也臣職非言路緣奉詔書朝廷
及軍民中事有未宜及利有當興害有當除者諸人直

言無隱欽此臣不揣識見淺陋冒瀆聖聽不勝戰慄之至具奏該通政使司官奏奉聖旨該衙門知道欽此欽遵抄出到部看得湖廣武岡州等處地方先因苗賊出沒侵擾本部已經節次具奏行令總督軍務右都御史王來公同總兵官保定伯梁瑤督同守備叅將都督陳友等并巡撫右都御史李實設法調度官軍民壯人等務在勦捕盡絕今奏又要另選才行智謀之士前去督理軍務一節緣彼處見今欽差內外文武官員數多又

有巡撫巡按監察御史同都布按三司官分投整治矧
今軍務方殷下人供億煩勞凡事宜從節減若又差人
前去非惟事體不一而人難遵守抑且號令雜出而事
難成功委有窒礙難以准理及甯良又稱武崗苗賊所
以出沒不常而無忌憚者必知守備官軍出師無算屢
被其辱又稱前項苗賊形容怪異熟於探聽進退譎詐
似曉兵術征勦貴乎急速不可久玩合無不必差官行
王來李實等協心比志和同計議整飭官軍申明號令

將前項苗賊出奇奮勇勦殺以保地方以安人民以副
朝廷委任之重不許互相矛盾怠忽因循以致久無成
功其甯良所言勦殺苗賊要用牯牛釵法出奇截殺如
果堪用此法宜從王來李寶等依法措置務在博采衆
長安邊保人不知偏執已見疎虞誤事緣奉欽依該衙門
知道事理具題景泰三年八月初三日奉聖旨是欽此
兵部為邊情事兵科抄出提督松潘兵備刑部等衙門
左侍郎等官羅綺等題節該欽奉勅得巡撫左僉都御

史李匡奏舊維州地方原係保縣管轄後為雜谷侵奪
今年棟巴占據欲杜棟巴覬覦之心須復維州之地欲
消棟巴反側之意須絕往來之人似亦有理勅至爾等
合將前項地方退還保縣掌管以為我邊之利欽此欽
遵查得先據棟巴罕呼宣慰使司事都指揮同知科爾壘
嘉勒察呈奉左僉都御史李匡劄付舊維州退還等因
本番開稱舊維州地方沒拳頭大有他雜谷家砌累砌
房城子差人守把阻我馬路有本職開路到於舊維州

在雜谷家手裏搶得不在漢人上搶得這箇是我每西番體例你每不管他的是近蒙剗付到來你每差官軍守把有這等鈞旨我九日九夜夢也夢不出來你每差軍把守也是朝廷的本職差人把守也是上位的我把時與保縣寒水一方人民護持我不把時往往被他大姓野蠻搶殺軍民有你上司想怕我反這舊維州小去處你每不要行取時我十分害怕了若聽小人口時這一誦讐殺一千年也不盡不要尋取尋取了時久後這

一邊地方不得寧息那時不干我事乞仰都布按三司
作惡委官著落王永名下追徵殺虜頭目并燒毀寺觀
房屋人口家財牛羊等件責付被害人收領庶得邊方
寧靖等因得此臣看得本番包藏禍心積有年歲屢布
恩威略無畏憚比先有國師善巴住在松潘後門賊首
卓羅等住在松潘迤南長寧安撫司安撫喇嘛尔男崆
彭亦在舊維州與棟巴守碉房各番將邊方事情漏泄
棟巴其善巴因是將都指揮趙諒等就在松潘示衆善

已一向猖狂縱容番人搶掠糧夫通同分錢守邊大臣
莫敢誰何今善巴已死崆彭與棟巴守把維州臣將蓬
以術取回與伊父喇嘛尔在深溝完聚止有賊首卓羅
等近日臣同都指揮周貴左叅議張如宗將一家人口
盡殺無遺今科爾壘嘉勒察既不將舊維州退還保縣又
起釁端不知謀何事情差人往松潘後門到臣處呈開
要保溫布刺馬麻進馬赴京承襲國師善巴職事又聞
知薩沙爾安撫司地方有生番二萬七千餘戶要來臣

處投拜納貢本番惟恐生番阻隔徑行差人與安撫司
阿薩袞說稱你的官職不大你手下有箇道士丹衷我
與他蓋一座寺與五百箇道士守把有阿薩袞堅執不
從據下番招諭通事方昇報知臣等竊思科爾壘嘉勒察
陽示尊君之心陰懷侵蜀之意臣與都指揮同知周貴
右叅議張如宗計議專候投拜生番到來待以酒食撫
以恩信量差數人赴京進貢其餘遣回就於松潘迤西
緊要地方蓋與寺一座著令生番守把以為松潘藩籬

臣與周貴將棟巴差來之人撫之以恩待之以禮臣等
晝夜經畫仍行各該關堡嚴加密切隄備外緣生番數
多及棟巴立心險詐暗邀人心為禍情由不言可知况
松潘一帶生熟番夷叛服不常必得大將一員鎮守松
潘調度軍馬遥振軍威方可懾服夷情若候臨時奏請
誠恐倉卒之際急難措置臣同右叅議張如宗議得周
貴曾領大軍隨同靖遠伯王驥征勦麓川頗有機謀今
各關堡守備都指揮與周貴平咨似無統束及威州土

民王永所管大姓土番亦在保縣一帶雜處控制棟巴
正係緊要隘道又差土人守把三义按月關支口糧俱
係王永自備委官捍禦有功合當激勸伏望聖恩垂念
邊境乞請勅一道付周貴充叅將名頭往來四川維州
等處提督仍於四川都司支都指揮同知俸將王永授
以冠帶撫治土人嚴守邊關辦事候有功之日另行陞
賞實為兩便緣係邊情具題該本部官欽奉聖旨兵部
看欽此欽遵抄出到部叅看得羅綺奏保都指揮周貴

令充叅將及要將威州土民王永授以冠帶撫治土人辦事一節查得先該鎮守松潘都指揮高廣被馬踢傷該羅綺奏保周貴代替高廣鎮守本部已經依擬奏准請勅周貴鎮守松潘去後續該巡撫僉都御史李匡奏稱四川都司係各邊根本掌印官員必在得人都指揮周貴係先該鎮守四川內官陳涓等與侍郎羅綺及巡按御史同布按二司官節次奏准存留周貴常川在司管事要將指揮使李璿指揮同知李文選陞一員前去

松潘鎮守等因具題抄出本部又經擬議覆奏將李璿李文俱陞署都指揮僉事李璿令在都司管事李文令去松潘協同周貴鎮守後一年之間周貴整理邊務已有序序仍回都司掌印管事存留李文在彼守鎮今照松潘地方固為緊要之處而四川都司尤為總會之所羅綺所舉周貴前項才能雖是允合公論但恐都司缺人掌管兵備因而廢弛況科爾壘嘉勒漿陰有窺蜀之心其來已久而成都又有王國在內附近貴州草塘等處

賊寇不時生發周貴若止用於一處而全蜀恐難倚藉
兼且土民王永比先與土官巡檢董敏讐殺朝廷宏敷
恩典俱置不問近王永雖頗効勞終係土人中心未可
測度若便遽加冠帶誠恐助其聲勢充強難治况各項
事情係干夷情邊務必須博采衆議然後置制停妥本
部難以遥制合無差人鋪馬齎文與四川都布按三司
公同鎮守四川內官陳涓并巡按監察御史從長計議
應否將周貴令充叅將往來維州等處提督鎮守其土

民王永應否量與冠帶其於經久之計制御之策有無
久遠利便違礙明白具由會本差人馳驛回奏定奪不
許猶豫狐疑及推調因而處置乖方致貽方來之患及
遷延日久不即勘報以誤事機如違罪有所歸緣奉欽
依兵部看事理具題景泰三年八月十九日奉聖旨是
欽此

忠肅集卷九

欽定四庫全書

忠肅集卷十

明 于謙 撰

雜行類

兵部為邊情事兵科抄出提督松潘兵備刑部等衙門
左侍郎等官羅綺等題查得先該欽奉勅阿薩袞報有
生番二萬餘衆爾整所部軍馬十分用心隄備先差人
曉諭阿薩袞前項生番不必盡數來邊慎自防閑周密
爾有安邊良策悉聽從宜處置欽此欽遵除差諳曉夷

情把總通事方昇等前去斯曩日安撫司拘換安撫阿薩袞到來說稱委有生番二萬七千餘戶要來投拜臣與鎮守松潘都指揮同知周貴四川按察司副使歐陽洙四川布政司右叅議張如宗宣布朝廷恩威將阿薩袞撫以恩信待以酒食仍令通事方昇等前往西番接取生番并密探邊方事情已經具奏去後景泰三年七月二十二日據松潘衛指揮周剛帶同通事方昇於西番回還報說依蒙前去西番阿薩袞處見有棟巴罕呼

宣慰使司事都指揮同知科爾璽嘉勒察差人到於阿薩
衮處送盔一頂甲一副番語稱說你不要做和尚改作
道士罷有阿薩衮及子不從有棟巴密送番書二紙與
阿薩衮收看因見機密恐有別情用計於阿薩衮處棟
巴原送番書二紙討出黃夜前來將番書二紙呈遞到
官會同都指揮同知周貴右叅議張如宗議得棟巴近
日以來招集西番以利誘人揆其鄙見為禍可知除行
沿邊一帶關堡操軍嚴加隄備外查得松潘新城止有

操備聽調官軍一千五百員名設遇倉卒不敷調用乞
勅該部將四川原調去征進貴播官軍暫處二千員名
前來松潘控制邊方遙振軍威候來春河開時月仍舊
放回休息庶幾臨事不誤便益今照番書恐有別情具
本進繳具題該本部官奉聖旨該衙門知道欽此欽遵
抄出到部叅照所奏前因雖稱將棟巴罕呼與阿薩衮
番書二紙討出未審書中所說何項事情況棟巴罕呼
陰懷異圖非止一日今又將廬甲書信與隣境番夷頭

目意在結納其陰邪之謀已著其奸詐之情難測若不嚴加隄備臨期恐誤事機合無准其所奏令該府行移四川都司著落經該官吏即將原調征貴播官軍內摘撥一千員名差委的當頭目管領赴松潘聽侍郎羅綺都指揮周貴等提督捍禦地方振揚威武遇警隨宜戰守候來春河開放回休息不許故違有誤邊備仍將摘撥官軍數目起程日期回奏以憑稽考緣奉欽依該衙門知道事理具題景泰三年九月初一日奉聖旨是欽

此

兵部為盤詰事內府抄出鎮守甘肅印綬監右少監蒙
泰題據鎮守甘州都指揮僉事吳釗呈備肅州衛守把
加峪山關指揮使方暹呈送赤斤蒙古衛都指揮總魯
嘉勒指揮尚布哈等齎番文一紙伴送被虜走回本部
下千戶格古爾節并弟索克布索南喇到官審得格古爾
節供稱景泰元年九月裏被達靼台哈哲爾平章搶去送
與諾海台知院處住過去年十一月裏有額森同諾海

台調令人馬和托克托布哈王廝殺去了後聽得人來說
額森著阿喇知院做前哨遇托克托布哈王人馬廝殺把
阿喇的人殺了一千多阿喇也著傷了回到營裏又著
賽罕領三千人馬去廝殺一箇也不曾回來額森把頭
目吾恩克平章殺了阿喇見殺了吾恩克因這事上他兩箇
各自領他的人馬不知那裏去了今年二月裏額森弟
德都再收拾些人馬去尋額森尋不見到五月間回到
本處詐傳額森言語把頭目濟爾哈朗鄂勒扎哈爾布齊

等都殺了額森的娘營里三萬人都反著托克托布哈王跟前去了又聽得蒙克叅政原搶烏梁海頭目孟格圖領一百人馬反往額爾吉納東邊去了蒙克領二萬人馬趕上殺不過回去了後見滿營裏人都亂著四散往西北上去了六月二十日因亂偷拐馬二十匹同弟并妻女脫走三日見二十箇人追將來殺了他一箇人兩箇馬把我的女并行李奪回去了我到哈密邊上好住一箇人問說忠順王的弟和赤斤逃去的克勒伽要領三

百人往衛拉特去據供除將索南喇并都指揮總魯嘉勒等撫令回還將格古爾節呈送到官臣與同總兵官平羌將軍都督同知王敬叅贊軍務左副都御史宋傑等計議得格古爾節雖供前因中間恐有未盡之詞著令諳曉苗語都指揮僉事馬順覆審得本人所供與前相同叅照格古爾節雖稱先被達剌搶去一向住過因見彼營人亂拐騎馬匹同弟并妻女回還一節竊詳本人既是乘間脫走奔命尚不得暇又與追趕達剌對敵內

殺死一人仍往哈密邊上探聽聲息其謫詐之謀情弊顯然況赤斤蒙古衛陽雖尊事朝廷陰則竇持兩端今雖供言彼情並無憑據緣外敵之心難以准信猶恐本人反為外敵奸細假以逃走為由探我虛實疑我守邊官軍意在掩襲入侵除將格古爾節送回赤斤蒙古衛著落都督阿蘇等查審本人被搶的確緣由收發隨往及行沿邊一帶整搦軍馬常如敵在目前晝夜嚴加隄備外緣係走回番人傳說外敵事情并原來番字一紙

封識具題本部官欽奉聖旨兵部知道欽此又該平羌
將軍都督同知王敬亦題前事通抄到部叅照格古爾
節并索南喇所說前項事情與迤北節次走向人口傳
言俱各不同及況甘肅寧夏莊浪地方自秋月以來達
勒入境搶掠飛報聲息不絕若是額森果有此事蓋將
奔走竄伏自顧不暇豈能遣人四散窺我邊境兼且赤
斤蒙古衛雖曰尊事朝廷終持兩端觀望安知不受彼
約束因而誑言緩我邊備況自古內地之待外番不恃

其不來恃吾有以待之在彼之強弱虛實固不足論而我防範防備則不可緩今蒙泰等具奏前因意亦有見於此合無行移該府轉行總兵官都督同知王敬會同蒙泰宋傑等嚴督各城守備叅佐協副等官上緊整搦軍馬申嚴號令多設隄備固守地方如遇外敵侵逼務在相機行事或以慮勝或以智取或奮勇截殺以圖成功或持重固守以保無虞必須計出萬全事無一失不許纖毫怠忽致誤重事其赤斤蒙古等處設或差人前

來傳報聲息等件亦須外加優待內切防閑示以大信
懾以兵威俾其感恩畏威以消意外之虞毋或苟且輕
易以中奸詐之計緣以處置邊情及奉欽依兵部知道
事理具題景泰三年九月十一日奉聖旨是欽此

兵部為嚴邊疆以招撫外裔事兵科抄出文淵閣辦事
中書舍人何英題竊見陝西乃國家大藩控制西北重
地自洪武永樂年間至今必命文武大臣守鎮處置邊
方正統年間曾有都督鄭名及興安侯徐亨在彼撫鎮

後因年老將各官取回一向未蒙差人前去今雖有侍郎耿九疇在彼鎮守且文臣叅贊軍務撫綏百姓禁革奸弊可也至于選拔將士操練軍馬禦侮防危亦必得武臣而任之緣陝西操備官軍不下萬數況地理又與甘肅涼州寧夏等處邊境連帶聲勢相接如蒙乞勅該部推選智勇廉潔武臣一員前去陝西與侍郎耿九疇等官撫治百姓操練軍馬固守城池蕩滌邊務臣聞宣德年間衛拉特圖克濟殺散阿魯台其治下散漫餘敵阿魯

多爾濟巴勒等五六百人潛躲於甘州等處邊境攪擾陝西百姓數年轉輸甚至艱苦今北敵額森殺散托克托布哈部下敗殘窮敵無所依歸者甚多欲歸額森則自相猜忌而不敢歸欲往遼東大同宣府沿邊一帶則畏懼邊軍并三衛部衆而不敢往只得在於甘涼寧夏沿邊逃躲潛住臣今思莊浪蒙古節次殺死官軍搶掠人畜於近邊攪擾者正此一旅也況彼中多係甘肅住坐回回熟知地方邊境城池及楚肅二府養馬草場去處倘

黃河結凍餘衆糾合復來近邊攪擾實為未便如蒙乞
勅該部選差熟於幹辦通曉邊情一二人齎奉勅諭詳
寫榜文前去莊浪等處跟尋殺死官軍為惡蒙古宣布
朝廷恩威諭以利害如從則招撫來降倘或執拗不改
前非則量調涼州莊浪等處見操官軍相機勦殺以除
邊患便益具題該本部官欽奉聖旨兵部計議來說欽
此欽遵抄出到部叅照中書舍人何英奏稱要推選智
勇廉潔武臣一員前去陝西鎮守一節查得陝西先有

興安侯徐亨在彼鎮守近因巡按陝西監察御史甘澤具奏本官年老有疾不能治事所帶跟隨之人生事擾民等因本部已經擬議覆奏將徐亨取回赴京候陝西有警急用將臣另行定奪今議陝西雖是莊浪甘肅一帶報有聲息然未有大勢外敵而陝西腹裏地方別無緊急賊情且如各邊有警而腹裏鎮守官員亦難前去策應兼彼處亦有侍郎耿九疇同內官王莊兒等鎮守都督王禎張泰王敬等統領軍馬分投整治合無照依

何英所奏本部將在京侯伯都督武職大臣通行開具
員名請旨點差一員前去陝西鎮守惟復且不差官員
行耿九疇同王禎張泰王敬等公同叅贊內外官員督
同都布按三司官當此防秋之際務在整擻人馬振肅
武備以固邊境以安人心不許時常怠忽及互相推調
果有衆大敵情腹裏地方必用將臣守鎮另行具奏此
係重事臣等不敢擅擬伏乞聖斷其言要差通曉邊情
一二人前去莊浪跟隨招撫殺死官軍達剌一節議得

外商之情譎詐多端去來不常居止靡定部落星散實
難結以恩信大衆軍馬尚然追之不及今二三人却往
何處跟尋兼且額森既已不遣使臣今却令人跟尋殘
寇則是自起釁端而非安邊禦侮之道況近日甘肅一
帶擾邊達勒又未審的係何部落設若京師差人到彼
跟尋萬一踈虞未免失所受辱非惟因而透漏邊境消
息抑且外商謂我將臣無謀徒惹邊患無益於事委的
窒礙難行但于邊務軍情合無令該府差人馳驛齎文

與甘肅總兵官都督王敬公同叅贊軍務副都御史宋傑及鎮守太監蒙泰等從長勘議前項外敵是何部落有無來歷即今應否差人前去招撫如果相應就於彼處選差諳曉邊情人員徑自設法相機進止前去哨探得見宣明朝廷恩威諭以利害禍福令其歸款效順差人伴送赴京自有重大陞賞若敵情奸詐恐有後害難以差人亦要謹慎防範遇警隨宜戰守然此事王敬等必須斷以大義決不可猶豫狐疑苟且謀計及輕易舉

動致損軍威有乖事體仍先將應否緣由差人馳奏毋得遲誤若各官輕率怠忽處置不當異日誤事罪有所歸緣奉欽依兵部計議來說事理景泰三年九月十一日奉聖旨是陝西係腹裏地方不必再用鎮守官欽此兵部為邊情事准禮部咨禮科譯出泰寧等衛都督僉事格音特穆爾等番字奏文十三道內一道皇帝洪福前泰寧衛都督僉事格音特穆爾奏比先有聖旨北邊凡事務著來奏報在前額森著我每回本地方時留住

諤尼特穆爾王一千人如今也做他每回來了他每說道額森的人馬因見脫脫不花王的親屬有幾個人反出去了恐怕來邊上打攪聽得他說他每的營盤住近那了格音特穆爾王同母并衆頭目想朝廷恩賜盡心出氣力又一道皇帝洪福前朶顏衛奴婢多羅干奏我每順天道敬朝廷同四散住坐不曾我今正要差人來朝貢聽得托克托布哈王弟無了有特古斯太子托爾齊知院納哈特穆爾左丞等兩起前後反出走了說額森太

師在阿拉克呼瑪奇克埒海子卜魚兒海子等處地面住
劄因奏報又一道皇帝洪福前朵顏衛奴婢博囉叩頭
奏有奴婢祖父原受了達嚕噶齊職事後故了又有父托
津也做了達嚕噶齊職事著奴婢做了今差管千戶事的
呼嚕固岱等五人進馬去了怎生憐憫的聖旨知道該
禮部官欽奉聖旨該衙門知道欽此欽遵抄出到部叅
看得奏稱在前額森著我每回本地方時留住一千人
如今也放他每回來了又稱有兩起人反出恐怕來邊

打攪一節俱係邊情不係本部掌行事理因此移咨到部叅照泰寧等衛格音特穆爾等世受國恩錫以官爵開設衛分捍禦邊方其來已久但外敵向背反覆多端視強弱為叛服乃其故態近見額森梗化邊方遂乃捨順叛逆陰相趨附今因額森發遣回來近我住種乃以朝貢為名因來奏報聲息告討職事名雖尊事朝廷實則奸詐難測其言額森人馬多反出去恐我邊上打攪及那營盤往近境又言額森在阿拉克呼瑪奇克呼海

子等處住劄等因未委虛的難以憑信尤恐各人陰受
額森約束故來虛報此事緩我邊備況今日各邊節報
烟火聲息并敵窺伺若不豫為隄備誠恐倉卒無措致
誤大計未便合無行移該府差人馳驛齎文與各邊各
該總兵鎮守等官令其整搦人馬振揚軍威謹慎烽堠
以備不測仍嚴督沿邊一帶各該守瞭官軍人等務要
晝夜小心一體防備遇警相機守戰或密切差人遠為
哨探遇有外敵出沒必先馳報隣近守備官員務在犄

角夾攻互相應援以圖成功不許自分彼此因而誤事
及照朶顏衛博囉奏討職事一節會同通事都督僉事
等官昌英等審據差來人呼嚕固岱等稱說博囉有祖
和遜永樂年間朶顏衛都指揮同知故了他的父托津
不曾赴京襲職在本處曾受達嚕噶齊職事亦故了今博
囉在額森處亦受了達嚕噶齊職事差我每來進貢要襲
伊祖都指揮同知職事據說竊惟內地之待外蕃固當
示之以威尤當結之以恩因其來善撫之是亦懷柔之

道今博囉既已差人進貢求襲職事及伊祖原受都指揮職事相同合無准令襲伊祖都指揮同知職事以嘉其効順之誠以固其來歸之念仍請給勅諭令差來之人呼嚕固岱等齎回諭以朝廷恩威俾其感激圖報固守臣節保障邊方倘有外敵來擾必須盡力捍禦勦殺若有功勞朝廷陞賞不恤不許心懷疑貳叛服不常捨順從逆自速罪戾緣係處置邊務及裔人襲職事理具題景泰三年九月初十日奉聖旨是欽此

兵部為休息事照得在外各處城池俱有民壯操備即
目邊務稍寧況山東河南等處地方為灾人多饑窘并
在京錦衣衛係是近侍衙門差役煩重旗校人匠等項
又要選取操備誠恐人力不全兼且各處灾傷糧儲供
給不敷合無將操練民壯并在京錦衣衛操練旗校人
匠餘丁俱暫疎放休息各記姓名在官并造冊送部收
照遇警另行調用該管軍衛有司不許生事屈害如此
庶使事體便利糧得減省具題景泰三年十月十三日

奉聖旨是欽此

兵部為邊務事兵科抄出兵部左侍郎翰林院學士兼左春坊大學士商輅題臣竊惟守邊一事最為近日急務近因各邊操守官軍多係有名無實其故何也一則軍士寡弱一則衣食艱難夫軍士寡弱以戰則不勝衣食艱難以守則不固邊城有此二弊則必難為守禦矣今之居官者皆以遣使為請而謂邊方之事實不可為殊不知天下之事未有不可為者特患失於姑息安於

因循則事始不可為耳臣訪得大同宣府獨石馬營等處原操官軍在邊年久屢經戰陳自正統十四年蒙古侵逼或漫散赴京或因該管頭目帶領來京一向黃緣在京居住即目宣府獨石等處多係各處新發并河南輪班官軍在彼操守其輪班官軍既無室家可恃又無田地可耕因循度日懸望更替欲為久遠之計難矣若朝廷失於姑息安於因循聽令各官巧立遊擊等項名色前項官軍占留在京不行發遣則邊境城池愈見虛

空設有邊情將何備禦前言如蒙准言乞勅兵部即將口外大同宣府獨石馬營等處正統十四年以前原操官軍見在京居住者逐一查究并其家小盡數發口外各該地方照舊居住種操守不許各官仍前巧立名色占恠阻當違者治以重罪或有言前項官軍善戰合留在京操備者此不知輕重之論蓋京師百萬人馬中縱得前項官軍不見其多不過跟隨各頭目營幹家事而已若邊城得此官軍可以壯威武可以禦外敵可以使

其成家立業為久遠之計其為益孰為大哉惟陛下不
惑羣議斷發遣之則邊方得人而外屏自固矣臣又訪
得口外田地極廣除屯田軍士地畝已有定額外其守
關軍士多無田地耕種推原其故蓋因先前在京功臣
等官之家將口外附近城堡膏腴田地占作莊田以此
空閒田地又被彼處鎮守總兵叅將并都指揮等官占
為己業每歲役使軍夫布種收利肥己其守城等項軍
士非但無力耕田雖有餘力亦無田地可耕即目邊務

緊急在京官員雖不敢役使口外軍夫但莊田尚存未免占奪軍民之家而彼處親臨管軍頭目尚有占種田地數多及私役軍夫撮借官牛等項其弊仍未盡革若朝廷失於姑息安於因循不即將前項田地撥與各城軍民耕種則衣食無由足給而邊境愈見空虛前件如蒙准言乞勅戶部選差能幹官員分頭前去大同宣府懷來永平等處會同各該都御史御史等官将在京官員莊田并彼處勢要之家占種田地盡數分派與附近

軍民為業若原係起科田地亦須斟酌量從輕科仍乞勅各該鎮守總兵等官將各城堡軍士分作二班每上班六日令其操備下班六日盡數督令布種秋成之日併力備禦仍禁革官軍頭目不許多種田地如此則軍士之衣食自給而民間之轉輸可省矣且耕且守古人如漢趙充國諸葛亮晉羊祜皆已行之明效大驗著在史冊今日守備之要莫過於此若舍屯田之外而欲邊城充實雖傾府庫之財竭生民之力奈軍士數多歲月久

遠亦難繼矣若有言前項功臣等官不可以無莊田則
或於腹裏遠處地方量宜撥換口外之地決不可聽其
置立莊田侵損在邊軍士有誤國家大計實為不便臣
又訪得永平等關口各隊官軍精壯人民安業而紫荆
倒馬一帶關口官軍怯弱關內人民不免驚疑推究其
故蓋永平等處係本土官軍而紫荆倒馬等關係在京
撥去輪班官軍衣食不給全無顧忌外敵若來不過為
逃走之計然此事屢有言者而本部未即施行其意蓋

謂京師根本之地宜留保定等處精銳官軍在京操守殊不知方今急務守邊為上守關次之若徒守京城此名下策何也若邊方失守則腹裏人心望風流移人心動搖變故百端縱有京師軍馬外敵在邊亦何所施又有言在京管軍頭目利保定等處官軍供給柴草因此占留若或有此尤為不可前件如蒙准言乞勅兵部將保定真定等處在京操備官軍發回各附近各關口定立班次永遠操守如或不敷於附近衛所軍內遞相撥

補却將見在各關輪班官軍盡數取回在京操備如此
非惟兩免重支口糧抑且邊關得人加京師鞏固雖有
千百額森亦何足慮凡前三事於守邊守關頗為切要
但恐於人情有礙伏望陛下決意行之則邊方幸甚具
題該本部官欽奉聖旨邊境戰守之法最為緊要足衣
足食軍中急務戶部兵部便計議斟酌可為經久之計
傳當施行欽此欽遵抄出到部除要差官分投當去大
同宣府等處踏撥莊田等件戶部另行外查得先於正

統十四年為因蒙古侵邊口外宣府獨石馬營等處官軍家口多有驚疑逃散來京朝廷軫念其艱窘暫留在京安插又因昌平侯楊洪率領口外官軍都指揮宗泰等三十員名赴京應援於倒馬關等處追勦外敵還京該本官具奏存留梁泰等在京隨操景泰元年節該議奏欽差都督孫安前去獨石馬營等處將各該廢壞城堡照舊逐一修理前項京師安插家口并梁泰等官軍盡數督發過口聽孫安等調督續設右都督楊俊奏要於

梁泰等數內存留指揮柳春等一百員名并總兵官武清侯石亨都督石彪亦要留原帶來之聽調大同右等衛官軍一百一十四員名在各官名下跟隨聽候遣調已經奏奉欽依存留外其餘官軍并安插家口一萬有餘節次具奏令楊俊督同五城兵馬司排門逐一挨究盡數發回口外去訖已經備由回報本部即目京師並無遊擊等營將口外官軍占留不發今商輅具奏前因實係今日急務豫備良圖但以口外官軍別不曾多留

在京止是楊俊存留柳春等一百員名近日口外地方
節報聲息因柳春等原係口外之人備諳彼處山川道
路本部奏差或二人或五人十人分投出境兼同彼處
夜不收哨探聲息回報及石亨石彪存留大同官軍鄭
倫等一百一十四員名近該石彪充大同西路叅將鄭
倫等數內帶去一十九名係是口外官軍暫得在京差
調之數合無照依所奏候明年正月盡間春暖盡數督
發過口尤恐即目邊報未寧遇有哨探聲息亦無慣熟

人員兼且柳春鄭倫等其數不多暫且存與石亨楊俊
隨操差調候邊報寧息發回未敢擅便定奪伏乞聖斷
又查得先該戶部議奏京師多調密雲通州保定等處
官軍操備并附近關口又撥在京及別衛所官軍前去
操守兩為不便欲將前項衛所官軍儘於本衛操練在
京官軍俱各取回等因具題抄出到部為照在京撥去
各關操守官軍不下數萬而保定等衛赴京隄備官軍
每衛不過二三百及千餘人今又分作三班輪流放回

取討衣鞋若將各衛原撥在京操備官軍發回不無不
穀守備遇警無憑調遣所言難准本部官奏奉聖旨是
欽此欽遵外今商輅又奏要將保定真定等處在京操
備官軍發回各關口操守却將京師撥去各關墩官軍
取回赴京一節臣等竊詳經理天下之事有當守經有
當行權者不可一槩而論照得永平山海古北喜峰等
關口非惟彼處土軍修守便能壯固蓋緣各關口山川
形勢險阻隔絕而近年以來達靼亦不曾侵擾以此城

池堅固樓櫓整齊而所在提督總兵等官如食都御史
鄒來學等各能盡心巡視整飭以故修理完堅而密雲
等處為因軍士不敷在京尚撥去官軍五千之上即目
在彼協助修守其倒馬紫荆白羊等關口比先年間止
是附近官軍守禦京師不曾發兵近因達靼為患其入
口之時往還俱從各關口出入又因連年砍伐柴薪將
附近山場樹木為之一空兼且山坡平漫所在可通人
馬委的難於修守以此計議京師發兵前去協助一處

或有一萬或五千三千者此蓋權時之宜而非經常之道後因侍郎江淵等議奏中千戶所調去紫荆關真定衛中所調去倒馬關涿鹿衛中千戶所調去白羊口前項所分官軍不問在所及在京五軍神機等營盡數發去該關設立所分守禦後又將大寧都司所屬茂山一衛全伍官軍調去設立所分以備策應紫荆關各該關口官軍即目修守已及三年節蒙朝廷賞賜編伍派定關隘修守頗有次第其保定真定等衛分選在京師官

員自永樂年間到今在五軍營者已選作團營操練慣熟在神機營者已演放火器俱知急緩兼且附近各關如保定後等五衛并真定定州涿鹿等三衛多不過十衛每衛赴京操備官軍或二三百或千餘人大數計之不及萬餘及因內官武良奏言又將各衛次撥官軍俱各發回本處操守城池去訖而在紫荊各關官軍如紫荊一關已是一萬白羊口五千倒馬關七千居庸關五千小龍門三千已及三萬若將原衛官軍發去兌出各

門京軍非惟京中撥去數多各衛發回數少所在守備不穀遇警有礙事機抑且以京師騎射慣熟之人兌換關隘備守之士則長於戰者抑之使守熟於守者驅之使戰一有舉動兩非所宜以經常之道度之紫荆倒馬等關既有涿鹿中等衛全伍調去官軍設立所分所據原撥官軍合當取回但今敵情奸詐患害難測正在緊關隄備之際若使輕易掣動尤恐人力不敷倉卒之間恐至誤事合無暫且存留候邊務寧息另行定奪此時

難以輕易更張緣節該奉欽依計議停當施行事理具
題景泰三年十二月十一日奉聖旨各關守備官軍俱
各不動待春暖時月定奪石亨楊俊原報的人留與他欽此
欽差總督軍務少保兼太子太傅兵部尚書管官于
謙等題為兵備事該五軍中軍馬隊大寧都司茂山
衛指揮同知夏正題臣居官四代荷祿至深誓欲盡死
未嘗臨事今蒙選在頭撥團營率領人馬臨事因循苟
且曠職不修無所逃罪臣聞晁錯有曰器用不利卒予

敵也將不知兵主予敵也君不擇將國予敵也繇此言之往年土木是也皇上中興邊境稍寧實因明良相濟今外裔入貢絡繹不絕請求無厭詳其所以不獨勞民之供給實窺中國之虛實臣借宋言之金以和議誤宋宋以始終被惑者何也蓋因比時大臣小官立心不忠專主和議以致宋乘輿播遷國勢日促蘇軾有曰平居無犯顏敢諫之士臨難必無仗節死義之士誠哉是言也如臣所言養今日之氣莫如守伸今日之氣莫如戰

挫今日之氣莫如和兵法曰無恃其不來恃吾有以待
之今將所見四事條陳庶有補於兵備者宜採擇之恕
其狂妄具題景泰三年十二月十五日該通政使司官
奏奉聖旨總兵總督衆頭目每看欽此欽遵會同五軍
三千神機等營總兵等官太子太師武清侯石亨安遠
侯柳溥都督張軌等并合營坐營把總都指揮等官王
淳等將指揮夏正所言事件逐一議擬開立前件具題
奉聖旨是欽此

計開

一曰選將前件看得在京各都督都指揮等官俱係曾經戰陣或平日頗有謀勇量才遴選今其坐營把總領隊管軍係見行事例別無定奪

二曰練兵前件看得所言要做三疊陣法置立釘牌鐵蒺藜等件禦寇一節緣外敵用兵不分行陣其去來如飄風驟雨禦敵出奇難以拘泥常法

且古人有言陣而後戰兵家之常運用之妙在乎
一心是以不豫擬遙度為工而以臨期應變為貴
況此等操練法器俱係行兵常事難以執一而用
合當相機而行所言窒礙難准

三曰兵將相識前件奏要每營選一良將常川發
號施令選驍勇有膽氣者副之一節有例見行其
稱每隊用牌書官軍姓名以被呼召一節緣用兵
之法不測如陰陽若各營官軍一一書寫名姓使

敵人闖知因而知我虛實豈不有誤機務此可用
於操練點閱之時而不可用於摧鋒禦敵之際窒
礙難准

四曰嚴立軍法前件看得刑賞威福乃朝廷之大
柄非臣下所敢擅專若依所言則賞罰不出於朝
廷而威福得由於臣下矣且此法可施於臨敵禦
敵之際而不可用於平居無事之時合候出師之
日另行奏請定奪

兵部為番賊為惡搶擄等事兵科抄出提督松潘兵備
刑部左侍郎羅綺題據松潘衛指揮同知徐昇呈奉臣
劄付前去四川城內密訪拉忠得獲解來施行奉此依
奉於景泰三年十月初一日帶領諳曉夷情總旗陳真
保前去成都府錦官驛等處密切緝訪本月二十三日
果有賊首拉忠改名索諾木琳沁投託棟巴以通事名色
帶領進馬番人至京回還至十五日本賊率領番人朝
見蜀府二十六日未時分是昇於錦官驛西街酒店內

置酒令陳真保前去驛內邀請臘仲飲酒至晚是昇袖
內抽出木棍一條向拉忠頂額上儘力打訖二下昏沉
不省就行擒獲當令陳真保綁縛寅夜馱至地名彭縣
押解前來是昇先來計稟等因得此案照先照兵部咨
該臣等題查得鄂特揚等寨番人穆蘇拉忠投託善巴結
為心腹及善巴備馬一百二十匹令穆蘇拉忠送與棟
巴幫貼進貢仍令穆蘇拉忠窺覘京師事情行至中途
穆蘇走回於善巴姪吹嘉勒戩藏處躲避緣拉忠係造惡

之首邊患之魁見與棟巴進馬未回具題抄出到部行
該禮部查無拉忠名字竊緣本人係國師善巴心腹為
惡渠魁誠恐指以進馬為名潛藏松潘更名易姓緝探
事情若便追究誠恐驚疑及穆蘇先子吹嘉勒噶藏處躲
住慮各人外結內應走透邊情禍患非細合行整飭守
禦官軍嚴加防範仍差人緝訪拉忠曾否進馬來京未
速見在何處各要設法密切撫捕不許虛張聲勢以露
形跡毋令漏泄事情致貽邊患緝捕得獲奏請處置如

穆蘇拉忠能擒獲到官重大陞賞不吝緣係擒獲為患
番人事理具題該本部官奉聖旨是欽此欽遵備咨准
此臣料算拉忠赴京已回尅期將至回回棟巴地方一
時難獲推選得松潘衛指揮李鑑徐昇在邊年久頗有
機謀備識穆蘇拉忠劄仰各官分投緝捕於成都府錦
官驛等處密查棟巴進馬番人關文誠恐拉忠更名易
姓就令本官守候回還設法擒拏去後續據指揮李鑑
呈稱有賊首穆蘇於松潘城東門外混同賣柴熟人往

來城下行走緝探事情城裏有多少軍馬前後行走五
日不回叫同通事方昇設法籠絡入城待以酒食就行
擒拏報知臣等督令寅夜斬首除已具奏外今徐昇呈
報又將拉忠以術生擒見在彭城若欲押赴松潘沿邊
一帶俱有善巴一姓番人善巴又行差人襲職誠恐驚
疑生釁貽患邊方隨令千戶張昱前去迎回著令所在
地方牢固堅收候臣差人至日解京定奪恭照棟巴素
號生蠻妄自尊大累受朝廷陞賞不知滿足乃敢與善

已交結意圖不淺况善已已死穆蘇拉忠令棟巴負王
上深恩泄漏邊情致使棟巴百般舉謀以利啖餌西番
資為羽翼已將穆蘇密切誅戮外今拉忠即索諾木琳沁
又被臣誅利劄仰徐昇急急生擒皆遵聖幾睿算今有
善巴姪嘉勒戡藏蜡匪簇土官發蜡長男寧安撫司刺
嘛爾俱係棟巴心腹臣每相見待以酒食虛示恩威設
遇為患相機行事除行沿邊官軍嚴加隄備及將善巴
番人密切防範外乞勅該部將徐昇等念以微勞量加

陞用將來有警易於用人今將獲功官旗并賊首姓名
開坐具題本部官奏奉聖旨兵部知道欽此欽遵抄出
到部隨據四川松潘軍民指揮使司舍人徐貴告蒙提
督兵備刑部左侍郎羅綺批差齎本伴送為惡番賊拉
忠赴京景泰三年十一月十五日行至青州東陽地面
不期本犯得患傷寒病症於本月二十三日行至利州
衛將軍橋身故告蒙本衛委官相埋外今將本衛印信
結狀通告到部查得先該刑部左侍郎羅綺等題稱松

潘管下鄂特揚等寨番人穆蘇拉忠投托善巴結為心腹
及善巴備馬一百二十匹今穆蘇拉忠送與棟巴科爾壘
嘉勒察幫貼進貢仍令穆蘇拉忠窺覘京師事情行至
中途穆蘇走回等情具題抄出到部為照拉忠進馬來
京行查棟巴差來番僧數內不見拉忠名字見在誠恐
本人指以進貢為由潛藏松潘等處或更名易姓前來
緝探事情及照穆蘇先已走於吹嘉勒戩藏處躲避慮恐
各人外結內應走透邊情為患非細已經議擬覆奏行

令羅綺周貴等差人緝訪拉忠曾無進馬來京惟復在邊潛住及穆蘇見在何處躲避各要設法擒捕去後續該羅綺等奏稱木速已被擒殺今抄前因雖拉忠病故相埋明白緣係緊關人犯恐有奸詐合行四川都司轉行利州衛委官重覆相驗明白回奏定奪所據奏稱要將獲功官旗徐昇等陞用一節緣番僧拉忠止是一人又因進貢回還致被各人誘引擒獲不係臨陣斬獲賊首功次難便陞用合無行移禮部照例給與賞賜以酬

其勞穆蘇拉忠雖已俱被殺死竊慮彼處提督鎮守等官以謂棟巴罕呼心腹之人既去邊境可以無慮因而怠弛兵備致有疎虞又恐棟巴罕呼因見穆蘇拉忠相繼殺死起釁生事尋問各人下落搖毒扇禍重為邊患不可不慮合無行移該府差人馳驛與左侍郎羅綺都指揮周貴從長計議設法區處遇有棟巴罕呼差人到邊訪問各人下落結怨起釁必須諭以朝廷恩威利害禍福折彼奸詐之謀俾之無由起釁仍戒飭各處關隘

守備官員整擲軍馬嚴加防範不許因而怠忽邊備失
誤事機緣奉欽依兵部知道事理具題景泰三年十二
月二十二日奉聖旨是欽此

兵部為公務事兵科抄出錦衣衛正千戶郭英等題今
將校尉邵敬等看得有禮部安歇使臣數內漢人婦女
王氏言說有達子托克托穆爾番語說稱我每回去到開
年三四月間來先把宣府城子圍了只圍得城裏無糧
草以後將河路船隻截住用火燒了這百姓每都是我

的具題本部堂欽奉聖旨兵部知道欽此又該戶部江西清吏司署員外郎事主事楊伸題稱先在臨清監收船料鈔貫有平江侯陳豫在彼鎮守軍民知所畏懼地方賴以安靖近者本官欽取回京有等軍民糾合四外逃民人等聚集成羣白晝搶奪人財或夤夜於沿河劫掠船隻軍衛有司莫能禁捕乞勅陳豫仍往本處鎮守等因具題通抄到部叅詳所奏前項軍情雖稱傳說之言未見的實緣外敵額森等懷蓄奸謀素來已定即今

雖差使臣赴京朝貢而其部落却又出沒我邊難保必
無變詐但宣府正係邊境去京不遠正宜謹慎防守庶
幾事機不失合無令該府差人馳驛齎文與宣府懷來
永平萬全左右獨石馬營等處總兵鎮守叅將提督等
官當知外敵之奸當念邊事之重務必十分盡心區畫
多方設法防備彼此和同爾我相濟若有緊急軍情就
便隨宜戰守不許纖毫輕易急忽致有疎虞該府仍行
大同并各該緊要關隘總兵守備等官一體留意隄備

臣等又議得防範外敵慰安軍民尤當先事而慮方可弭患方來切見裏河一帶係南北二京通衢京師供億藉此轉運而臨清等城又係要衝之處先蒙欽命平江侯陳豫在彼鎮守本官委的廉靜有為軍民悅服其修理臨清城池一所人不告勞事有成蹟後因外使來朝邊烽頗息已將本官取回今既邊境所在日報聲息而腹裏城池地方盜寇竊發若非得人經理安能得其綏靜又況番人說稱要將河路船隻截住燒毀此亦不可

不備兼以楊仲又保本官有前項政蹟合無請勅平江
侯陳豫令其依前鎮守臨清往來德州東昌一帶提督
軍衛有司整搦官軍民壯修理城池器械撫安人民禁
革奸細凡事比前愈加盡心幹濟毋或始勤終怠有辜
任使但遇邊方有警即將沿河軍民如法安存船隻如
法整治務在有備無虞候邊報寧息事體妥妥另行具
奏還京如此非惟隄備謹嚴而外敵計無所施抑且委
任專一而緩急不致誤事具題景泰三年十二月二十

七日奉聖旨是欽此

兵部為邊情事兵科抄出提督松潘兵備刑部左侍郎
羅綺題景泰三年十二月十七日據指揮郭禮備鎮守
平夷堡指揮僉事陳江呈該通事蔡三報本月十三日
有勒都簇歪地寨土牌尚呼等前來報說有博碩袞寶
格寨糾合沙克嘉格扎克額貝等寨番人聲言上路搶劫官
軍十四日有下五簇西浦寨土牌三堡猪如等說報有
我前去額貝做買賣有善已在那里與蠻子殺牛泡酒

糾合小姓番人散木剌子聚衆要來攻打關堡搶刼糧
夫截殺官軍我聽得與你說知委的滋蔓為極等因隨
據指揮徐貴呈本月十五日節有隆薩恭等寨番人達
哩等來報地名旺達爾勒都額貝等寨番人聚衆要與
官軍廝殺本月十六日巳時本職巡至北定關地名石
關子忽有番人一百餘衆吶喊過河圍截擺哨官軍搶
刼糧夫當同指揮冀廣等督軍與番對敵射傷番人三
名砍傷番人二名扛扶過河被番刀傷百戶沙摩布捉

去軍人三名箭傷軍人二名番人在山揪放礮石阻截道路等因備呈到職照得已死國師善巴為棟巴心腹每將邊情漏泄棟巴撥置本番百般舉謀侵擾邊境今善巴已死伊姪則鬼占藏敬意欲做倣善巴為患邊方臣已素知各賊處心險惡要於河乾水淺乘我官軍年久疲敝糾合番人搶劫兵部已經奏准將征進貴播官軍摘撥一千員名前來備冬止有指揮何洪管領官軍四百六十員名到來其餘五百四十員名月久不到及

照額貝等寨番人商議日久臣備知詳細已於本月初
八日密令千戶永和爾選調精壯官軍五百員名前來小
善巴地方指以巡視為名密切防備又添都指揮李文
并指揮徐昇龐福謝敞領官軍九百員名徐昇往浦江
關龐福往新塘關謝敞往北定關李文於歸化關兼聽
兩路應援千戶李忝領軍二百九十員名於鎮革等處
巡視指揮劉璫領軍二百五十員名於平夷等處巡視
千戶徐禮領軍一百員名於安化等處護送糧夫俱於

各關嚴加哨備謹守地方及有鎮守都指揮同知周貴
先於保縣踏勘棟巴地方未回臣於松潘嚴操軍馬整
飭器械遙振軍威若有勢衆聽候大舉仍行四川都司
催取原備冬官軍五百四十員名并量調官軍前來松
潘控制本月十九日據指揮劉璿差軍人胡昭口報番
人原槍軍人李歐先走回除將被虜官軍督令通事張
伏保喇嘛雲丹藏布親詣番寨守取及將誤事官員候
番人寧息之日另行查奏外如蒙乞勅該部於錦衣衛

帶俸達官內調選五十名定限前來隨臣調度併力殺賊候事體寧息回還便益緣係番人聚衆出沒并取達官事理具題本部官奉聖旨不准兵部知道欽此欽遵抄出到部除奏要選調錦衣衛達官前去彼處殺賊一節既已欽蒙聖斷別無定奪外所據奏稱番人聚衆將官軍殺虜一節係干番夷出劫緊急邊情合當設計撫捕庶免重貽後患合無行移該府鋪馬差人齎文與鎮守松潘都指揮同知周貴會同羅綺等從長設法區處

將原有官軍選委驍勇官員統領前去番人出沒處所
將前項為患番賊設法撫捕務在斟酌緩急相機行事
毋畏縮以長賊威毋輕率以墮賊計其被虜官軍既已
督令通事親詣番寨巡視亦須密諭張伏保等相彼事
體審度事情諭以禍福利害曉以順逆曲直使之感畏
懾服悔過送回擄去人畜如果負固生拘不肯送出飛
報羅綺周貴等或量調官軍襲取或另行設法處置不
許虛張聲勢驚疑激變及縱惡長奸重貽後患再照羅

綺周貴等不能整飭邊備隄防外寇以致番賊生發捉
拏官軍俱合究問但邊務方殷緊關用人合無姑且免
問本部行文切責令其上緊整理邊備務在賊盜祛除
邊境寧謐如仍怠忽誤事治以重罪若原調征進貴播
備冬官軍既尚未到就彼徑自差人催取協同赴彼操
守仍仰羅綺等將前項失機誤事官員通行查勘明白
具奏定奪緣節該奉欽差兵部知道事理具題景泰四
年正月十八日奉聖旨是欽此

兵部為邊情事兵科抄出提督松潘兵備刑部等衙門
左侍郎等官羅綺等題據提督關堡都指揮僉事徐貴備
守備歸化關指揮袁安呈該通事陶茂春報景泰三年
十二月二十七日有舒濟特寨番牌佐本結大空降寨番
牌雲瑪特來報有額貝寨番人同勒都簇番人前去大兩
河地方作歹被官軍射傷五箇內死一箇要去默恰巴勒
智等寨借人來小空寨隆地方偈橋亂石窖等處復讎
等語呈乞添撥官軍守備等因為照歸化北定平夷浦

江等處關堡番人一帶俱反要敗宣德二年攻圍城堡
搶劫得利臣等先已察知已調松潘并龍潘土漢官軍
都指揮等官李文等官軍二千員名於安化鎮革新塘
歸化北定浦江平夷金鉸等堡并番人出沒路口分布
稠密連日對敵不退該鎮守都指揮周貴保縣回還遇
逢督同官軍追賊過河殺死賊衆不遂奸計各賊要告
請將官軍掣回恐有奸詐又令指揮安昶管領官軍五
百員名往來巡視去後今據通事張伏保又報有後黑

水生番聚衆要來松州窺石崖等處出沒除會同都指揮周貴署都指揮僉事李文四川布政司右叅議張如宗議得松潘守備官軍年久疲敝蠻人為歹殺傷衆多若不豫為經久處置倘遇番人擁衆臨期卒難馭制且沿邊一帶關堡自松潘至茂州伍站三十四堡該五百餘里偏橋險隘山路陡峻都指揮等官巡視不過議得松州起至安化止四關堡臣等撥人巡哨鎮革至平夷止六關堡見有都指揮僉事徐貴提督金鉉起至靖夷

堡止見有都指揮郭禮提督永鎮堡起至新堡子止九關
堡見有都指揮孫敬提督實大關起至松溪止六關堡無官
提督其間長寧堡相離長寧安撫司喇嘛爾地方三十餘里
正係揀巴一姓緊要隘口罕呼起至七星關止六關堡無官
提督前項一十二關堡先有掌疊溪所事指揮楊徽提督今
照楊徽職掌所事又提督茂州一帶關堡誠恐有警彼此誤
事及照東路松州自望山關起至永進堡止一十二關堡
係毛公等寨蠻人出沒緊要之處再照十大關至松溪止

六關堡罕呼至七星關止六關堡望山關至永進堡一十二關堡合用都指揮二員指揮一員臣等推選得指揮使等官宰用等四員頗知各路夷情各官俱獲功次及長寧地方尤難撫治見得茂州衛千戶曹敏張振二員深知彼處夷情番人信服先該都御史寇深等屢經奏保及照松州迤東一帶關堡原係都指揮于晟提督今調本官提督青州一帶關堡伏望皇上念以地方為重乞勅該部將宰用等四員內議選二員曹敏等二員內議選一員俱署都

指揮指揮食事往來提督各該關堡設遇警各有職掌
臨期不致誤事實為經久便益緣係處置邊情分守地
方事理具題該本部官欽奉聖旨兵部知道欽此欽遵
抄出到部叅照所奏開稱前項番人已被官軍殺敗送
出人口講和緣夷情譎詐難測況又陰懷復讐之謀不
可不備合無行移該府差人鋪馬齎文與鎮守松潘都
指揮同知周貴等處會同左侍郎羅綺右叅議張如宗
嚴督各該關堡守備官員一體整搦軍馬謹慎隄備如

果番夷聚衆乘機為惡就便量調精銳官員出奇鼓勇
運謀設法勦捕不許畏縮無謀縱賊搶掠亦不許輕易
怠忽墮賊奸計其稱要將指揮宰用等四員內選二員
千戶曹敏等二員內選一員俱陞署都指揮指揮僉事
往來提督關堡一節查得松潘等處見有都指揮同知
周貴在彼鎮守又有署都指揮僉事等官在彼協同其
各該關俱有提督巡守等項都指揮等官領軍豫備係
是不缺若依所奏再將指揮宰用并千戶曹敏等陞署

前項職事在彼往來提督分守關堡則是周貴等與各分守官員名分相等未免彼此頡頏臨事難於管束況邊方用人責任宜專今以一方之地而用都指揮太多自是十羊九牧非獨下人難於奉承抑且邊務難於統理兼且各官雖稱殺賊有功亦係職分當為未經取勘功次難便定奪陞職若宰用等委的諳曉夷情堪以任用就令仍領原職依擬分投守備提督官軍設法撫捕賊寇有功一體陞賞誤事取罪非輕若以後建有擒斬

番賊功蹟另行請奏陞用緣奉欽依兵部知道事理具
題景泰四年二月十四日奉聖旨是欽此

兵部為夷人進貢事內府抄出鎮守薊州永平山海等
處右少監郁永題景泰四年十二月初二日據提調喜
峰口等處把總指揮僉事張鉞守備喜峰口指揮僉事
韓禎呈本年十月二十九日酉時該口外長哨夜不收
軍人崔時等走報本日申時哨至地名腰站瞭見達子
人馬順路而來備報隨領官軍同通事千戶丁貴前去

墳上水關荅話當有前報達子一十二名馬一十五匹
到關審得俱係福餘衛一起有齎來達子無印文書一
紙驗係都指揮可安男可台差達子巴圖等六名一起
無文書審係頭目哈克台差達官布琳等六名俱係恭遇
冬節前來叩頭進貢審實整擲官軍擺隊驗放全關除
各人帶來弓箭封寄在官人馬送鎮守總兵官都督僉
事宗勝處備開存留起送毛齒等數差人伴送赴京外
開坐具題該禮部官欽奉聖旨禮部兵部知道欽此欽

遵抄出到部除進貢使臣馬匹番字等件行移禮部徑
自查照施行外參照前項來使雖係福餘衛差來實受
額森約束名為赴京進貢實則窺瞰邊備況彼酋額森
等今歲差來使臣比與往年不同既與宣府大同分道
而來又從甘肅獨石各另入境已是奸詐難測近日朵
顏三衛餘衆各稱進馬自獨石并萬全右衛入境今福
餘衛之達子又行分作兩起自永平山海入關則是各
處邊境俱有外敵分布情偽譎詐莫甚於斯兼且此等

使臣額森未曾差人之時不曾見其進貢今則隨彼黨類相繼而來絡繹不絕而近日走回人口何狗兒亦說彼酋也先等分投差人進貢躍看道路并邊境人馬虛實及差人於三衛餘衆處打聽邊境消息而三衛殺馬相待交結往來詭秘周密勾引侵逼之謀不言可知且邊境無事之時尚當加意隄防矧邊情變詐之際豈可視為尋常防患未然不可不備合無行移該府轉行各邊各關總兵鎮守提督協贊守備等項文武官員一體

整飭軍馬嚴謹隄備勿以彼使來朝為可恃勿以邊報稍寧為可忽雖平居無事之時常如臨敵交鋒之際如遇外敵進貢經過去處必須比舊愈加嚴慎毋或恃常怠慢致誤邊備致墮狡計仍嚴督沿邊一帶哨守官軍人等晝夜用心瞭望密切防範如有外敵近邊隨即飛報所在總兵鎮守守備等官星馳督屬隄備相機守備以圖成功以濟邊務如有疎虞罪不容逭仍行在京各營總兵等官上緊操練軍馬申嚴號令振揚兵威作新

士氣俾部伍嚴肅而遇警易為調度使兵將相識而臨敵易於成功不許視常因循玩愒歲月以操練為具文視軍務如等閒以致臨期調用倉卒無措致誤國家大計罪及身家母悔緣以隄備邊情及節奉欽依兵部知道事理具題景泰四年十一月初十日奉聖旨是欽此兵部等衙門掌部事少保兼太子太傅兵部尚書等官于謙等為糾劾事兵科抄出南京兵科等科給事中謝垢等奏照得先因南京灾異節該欽奉勅諭守邊官員

凡遇議事各懷已私彼此猜疑互相矛盾勅至爾等務在盡心滌慮守法奉公痛改前日之愆益廣自新之路協和一心修明庶政庶幾以回天意以副朕懷如或不悛國法咸在欽此欽遵奈何自冬徂春嚴陰沍寒連旬不解堅冰積雪三尺餘深馬牛凍死餓殍流離京師人民驚駭為異豈非為臣下者不能仰遵聖訓之所致與竊照南京守備寧遠伯任禮叅贊機務南京戶部尚書張鳳協同守備都督僉事趙倫俱以凡庸叨膺重任正

當恪遵聖訓改過自新以求無負委託之重可也豈期
任禮趙倫於景泰五年二月初六日在守備廳內各惡
言大聲罵詈任禮歷數趙倫平日貪淫之跡衆所共見
彼時叅贊張鳳在側不能折制其爭端乃却緘默而隱
忍次日復同趙倫親詣任禮家跪拜和勸似此互相矛
盾焉能協和以濟大事哉且任禮年將八袞衰邁龍鍾
庸懦無為縱頭目而作弊罔諳事體弛紀律而不嚴張
鳳以偏執龕魯之儒乏經濟變通之術議事罔持其公

論臨謀每見其乖方濫受軍民詞訟不能剖決其是非
擅制問刑之官輕重悉由其出入自膺叅贊之任不聞
集事之能至若趙倫一介武夫愷邪譎詐蔑視總兵擅
專一己之權陰結叅贊誕肆奸貪之志侵占蘆蕩採賣
銀兩肥己廣置田莊私役軍人耕種假喪禮以邀屬官
之饋賄姿淫慾而擡故人之遺妾迹其過惡難以具陳
臣等竊詳總兵守備固在得人而叅贊軍務尤所當重
苟得其人則一人任之而有餘不得其人雖衆人任之

亦不足況協同守備之官為因多事而設即今四方寧謐不無官多事擾理在當革參照任禮趙倫既不能修省以弭天災乃敢肆爭以違聖訓又照張鳳明知彼此挾私忿爭自合指實參奏取自上裁却乃阿附私和互相欺罔原情論罪法所難容若不早加斥逐何以懾服奸雄乞勅法司拏問明正其罪以警將來仍勅在廷大臣會選練達老成素有名望者前來總兵參贊庶使天意可回災異可弭而國法昭彰矣緣係應議及堂上并

推選總兵叅贊官員事理具奏又該南京廣西等道監察御史楊敷等奏嘗謂爭已私而違聖訓者法所難容濫名爵而肆奸貪者罪在不宥竊照南京中軍都督府掌府事守備寧遠伯任禮叅贊機務南京戶部尚書張鳳協同守備都督僉事趙倫官居八議位列六卿恩寵莫加顯榮已極為各官者正宜罄竭忠藎寅亮天工可也却乃貪祿圖位蠹政妨賢其任禮年將八十昏耄無為出入則用人扶持處事則乖方顛倒自汨事以來未

聞贊一善革一弊也。邇者為因各官議事互執已私以致災異迭見。今蒙勅諭特令修省改過。其任禮等自合克己以順天心。却又稔惡不悛。仍於本府議事廳互相毀罵。欲行拳毆。歷數趙倫奸貪不法事情。人所共知。彼時張鳳當先以正道息其爭端。却乃待其惡言外聞。纔方勸解。及趙倫因任禮聲言要行具奏。懼怕許出平日非為。浼同張鳳親詣任禮宅內跪拜請罪。張鳳再三用言和解。任禮聽從。歇罷不行。甚虧大臣之體。何以表率。

於人張鳳才識麓疎性資克暴徒冒叅贊之名全無經濟之行濫受詞訟不能裁決縱令問刑百戶顛倒曲直其趙倫曩因南北多事之秋暫添協同守備即今四方頗寧安用一介庸夫蔑禮義之行乖廉恥之風占用軍職跟隨而虛張聲勢出入八人擡轎侵占軍民田土蘆蕩令軍人耕種賣錢入已遣祭尚書趙新方畢即又買其嬖妾輒擡回家似此非為難以枚舉比來自冬徂春陰凝寒沍雨雪非宜貧窘凍餓而死者不可勝數皆因

各官惟務私意虐害軍民而致然也詳其所由俱合究問臣等職居言路不敢緘默伏乞聖斷將各官挈送法司明正其罪以警其餘別選文武大臣素有聞望練達治體者前來守備叅贊則政務易舉而天心可順矣緣任禮等係應議大臣及在京堂上官并推選大臣具題該通政使司官奏奉聖旨南京係根本重地守備叅贊官要得其人令他每說任禮良老趙倫貪淫張鳳已取來京著兵部會同多官計議傳當來說欽此欽遵通抄到

部會同五府各部都察院翰林院大理寺通政司六科
十三道等衙門掌中軍都督府太保兼太子太師寧陽
侯陳懋等議得南京係祖宗根本重地東南總會之所
守備責任至重匪輕兼且比年以來災異迭見軍民艱
難感召不虛必有所自正宜慎選守臣以防他變豈可
委之匪人以貽後艱今照寧遠伯任禮老耄昏瞶舉措
乖方素乏統馭之才難稱守備之任身既不能自強志
何有於國事然其人更事頗多別無贓過今訪得平江

侯陳豫廉靜不貪才堪鎮撫合無請勅一道差人齎與
陳豫令其星馳前去南京更替守備取回任禮閒住但
陳豫見在山東河南等處操軍即目彼處旱澇災傷盜
賊生發緊關用人若用陳豫亦必得人代替今看得鎮
武營統兵官署都督僉事都指揮同知崔福歷練老成
不貪財賄頗得人心堪以任用合無請勅本官令去山
東等處代替陳豫巡歷地方操練軍馬撫恤兵民防禦
賊寇候事體寧息之日另行定奪惟復任禮且不更替

請勅前去戒飭本官令其悉心盡力痛革前非以理公務以安軍民不許偷安怠忽及偏聽小人以誤大計如違罪不容逭未敢擅便定奪伏乞聖裁及照都督僉事趙倫本以一介小人濫任協同守備素無汗馬勲勞驟擢都垣重任榮盛已極穢惡彌章譎詐儉邪而習以成性貪淫浮薄而人所共知罔顧廉恥擅作威福愚弄主將而獨肆已奸剝削下人而衆皆切齒占蘆蕩以侵漁民利種田庄而私役軍餘因喪設計受所部之贓私恃

強縱淫奪故舊之嬖妾原其情犯跡其本心實禽獸之不如而神人所共怒此而不懲何以警衆若便行提究問誠恐愈加展轉奸計因而得施合無就将趙倫降除都指揮同知改調廣西都司柳州衛帶俸隨操聽彼處總兵官調度殺賊贖罪如若仍肆奸頑及營求奏保展轉延住定行治以重罪不宥庶以快衆人之清議示國法之至公及照尚書張鳳才本龕踈濫膺重寄不能糾正小人乃敢徇私黨比似此妄為亦合究治但張鳳近

該吏部等衙門奏保戶部尚書行取未到合候本官至日另行奏議定奪再照南京既有守備勲臣又有兵部尚書張純叅贊機務若再添用協同未免官多煩擾合無革去協同守備之官以除政出多門之弊如此庶使法令嚴明而奸頑無由肆志委任專一而機務不致失誤緣節該奉欽依兵部會多官計議停當來說事理具題各官奉聖旨是如今山東河南正要隄防之時陳豫且不必動便寫勅去切責任禮著改過自新設法守備

再誤事不饒趙倫不才准議張鳳罷欽此

欽差總督軍務少保兼太子太傅兵部尚書于謙等為
預防邊備事該兵部題該右僉都御史李秉題稱迤北
差來使臣內鴻臚寺序班楊冕的男楊玉說稱額森老
營今俱往哈喇莽地面住坐統領精兵見在沙河一帶
藏住只看使臣回來說朝廷相待厚薄如何若不遂意
必有別圖等因具題抄出本部議擬具題節該奉聖旨
額森將精壯人馬近邊潛住雖未的實必早區畫恁每

總督總兵便計議如何伏候如何截路以逸待勞務出
萬全奇計來說欽此欽遵會同總兵官太子太師武清
侯石亨等計議得敵首也先違天悖理志驕氣盈假以
進貢為由遣人瞰我虛實而又糾率勁悍之衆日漸近
我邊方侵逼之謀既已彰露隄備之策不可不嚴但出
奇截殺貴在臨機應變難以一定而行今京師軍馬雖
多而朝廷根本之所在四方萬國之所依強幹弱枝不
宜輕動議得懷來為北邊要衝外敵欲要侵逼必先經

由此處彼處官軍數少糧草未備若要增兵守備出奇
取勝須當先積糧草以備不虞合預先行移五軍營撥
軍士民壯人等三萬五千名神機營撥軍二萬名三千
營撥軍一萬五千名共較七萬名各委公廉能幹的當
都指揮指揮千百戶管領仍委署都督僉事雷通總行
提督擺堡接運糧料各七萬五千石共一十五萬石赴
懷來收受其運糧軍人預先關領布袋十五萬條運糧
完日收還官庫仍乞恩每人關與銀三錢以為腳費及

置辦車輛繩索物件等項與鞋一雙以備行走跋涉前
項軍士及該運糧料陸續預先整理齊備候外使起程
隨即起運却於團營官軍內選精勇馬隊官軍一萬五
千員名領馬一萬匹步隊一萬員名至期於臣謙石亨
柳溥張軏楊俊羅通范廣過興郭震馬宗張義劉深內
請旨點差一二員奉勅統領前去懷來就彼糧草駐劄
以逸待勞一面差人探哨軍情緩急人馬多寡來路遠
近或於要害去處設伏以待或按伏人馬於山川險阻

水草利便之地俟敵半隱半出截路取勝務在計出萬
全不許纖毫輕忽其大同地方雖係緊要然相離京師
窩遠卒難應援況比先兵部節次行移總兵等官郭登
等令其計議如果應否遣將領兵前去協同戰守徑自
具奏定奪及行各邊關總兵鎮守守備内外文武官員
一體整備人馬固守地方各於緊要隘口及外敵出入
必由之路深掘壕塹多設隄備以防外敵侵逼出奇截
殺城堡牆垣淺薄低小者增築高厚山陂路徑坦平寬廣

者斬削陡峻但有外敵來攻隨即相機行事一面飛報
隣境守備官員互相策應及星報差人具奏其京師各
營務在十分上緊操練官軍聽候調用破敵不許因循
苟且致誤事機緣係計議事理具題奉聖旨是運糧料
准議行懷來操備一節待明年春暖軍情緩急定奪其
在京軍馬不可怠惰務在操習慣熟早為定計臨期不
致有誤欽此

忠肅集卷十